

HIKAYAT AMIR HASAN DAN AMIR HUSIN

ISHAK PEUTUA GAM



Direktorat
Budayaan

22



299.2792
154
b

HIKAYAT AMIR HASAN DAN AMIR HUSIN

Pengarang

ISHAK PEUTUA GAM

Dialihaksarakan oleh

Ramli Harun

Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1987

Diterbitkan oleh
Proyek Penerbitan Buku Sastra
Indonesia dan Daerah

Hak pengarang dilindungi undang-undang

Pengantar

Naksah Hikayat Amir Hasan dan Amir Husin ini terdapat dalam naskah Hikayat Raja Jeumpa yang sudah kami bicarakan dalam buku Hikayat Raja Jeumpa yang diterbitkan bersama hikayat ini. Tebalnya tujuh puluh halaman.

Menurut pengarangannya, Ishak Peutua Gam, hikayat ini diangkat dari sebuah hikayat "Hasan Husin" bahasa Melayu. Dengan susunan bahasa Aceh yang lumayan pengarang telah berhasil memindahkan sebuah karangan bebas ke dalam bentuk syair.

Dengan diterbitkannya hikayat ini sebuah lagi karya sastra Aceh telah memperkaya khazanah kesusastraan daerah. Semoga berguna bagi peggemar hikayat dan pengamat sastra daerah.

Jakarta, 1987

Proyek Penerbitan Buku Sastra
Indonesia dan Daerah

Ringkasan Hikayat Amir Hasan dan Amir Husin

Yazid bin Muawiah bermaksud kawin dengan Saribanun tetapi gadis itu kemudian kawin dengan Husin bin Ali sehingga membuat Yazid menaruh benci kepada Husin. Ia juga suka kepada La-ila, isteri Hasan bin Ali, dan dapat membujuknya untuk meracuni suaminya. Husin menggantikan Hasan sebagai khalifah di Medinah. Yazid yang berkuasa di Syam tidak senang dengan keadilan Husin di Medinah lalu ia bermaksud memerangnya. Tetapi mengingat di Medinah terdapat makam Nabi maka serangan ke Medinah dibatalkan.

Penasihat Yazid bernama Marwan Hakim memberitahukan kepada Husin bahwa tentara Yazid akan menyerang Medinah. Diserahkannya supaya Husin pindah ke Kufah karena rakyat Kufah setia kepadanya.

Dalam perjalanan ke Kufah pasukan Yazid menghadang rombongan Husin di Karbala. Dalam pertempuran yang tak seimbang itu Husin tewas. Tewas pula di tempat itu Hasim, putra Hasan dan Ali Akbar putra Husin sendiri. Yang membunuh Husin ialah Sa-

mar Zaif. Sesudah dibunuh kepalanya dipenggal. Delapan ratus orang pengikut Husin ditangkap termasuk putra Husin yang masih kecil bernama Zainal Abidin. Peristiwa itu terjadi pada tanggal sepuluh bulan Muharram. Di dalam penjara, Fatimah Zainab, isteri Husin mengirim surat kepada Muhammad Hanafiah memberitahukan peristiwa berdarah itu. Muhammad Hanafiah adalah putra Ali bin Abi Talib dari isteri lain dan tinggal di Bagdad. Menerima surat itu Hanafiah sangat marah lalu mengumpulkan semua pengikutnya untuk berangkat ke Karbala. Sampai di Karbala mereka melihat bala bantuan Yazid sudah berdatangan. Seorang pahlawan Yazid bernama Balakin berjanji akan menangkap dan menyerahkan Muhammad Hanafiah kepada Yazid.

Mula-mula Muhammad Hanafiah berhadapan dengan Sakin dan Salakin, keponakan Balakin. Sakin dan Salakin dapat ditewaskan. Kemudian Balakin sendiri juga tewas. Mengetahui keadaan demikian Yazid merasa kuatir lalu ia meminta seorang pahlawan yang sangat ditakuti orang bernama Khalik Dengki untuk menghadapi Muhammad Hanafiah, tetapi pahlawan inipun tewas di tangan Muhammad Hanafiah. Berbagai upaya dilakukan oleh Yazid untuk menaklukkan Muhammad Hanafiah namun tidak berhasil, sebaliknya Muhammad Hanafiah berusaha keras mencari Yazid.

Dalam suatu kesempatan Samar Zaif memanah Muhammad Hanafiah dan mengenai tangan kanannya hingga putus. Ketika Yazid hendak menghabisi Muhammad Hanafiah, dengan tiba-tiba ia tersungkur jatuh. Kepalanya pecah menyusul sebuah suara dari angkasa. Dengan bantuan Jibril tangan Muhammad Hanafiah sembuh kembali dan melanjutkan pengejaran terhadap musuhnya. Akhirnya ia dapat menewaskan Samar Zaif. Kemudian ia membebaskan para tawanan. Muhammad Hanafiah berpesan supaya Zainal Abidin diangkat sebagai khalifah menggantikan ayahnya Husin. Kemudian ia melanjutkan pembersihan terhadap sisa-sisa musuhnya. Ketika ia melihat Laila, isteri Hasan yang telah berkhianat terhadap suaminya ia segera mengejanya sampai wanita itu masuk kedalam sebuah gua. Gua itu mempunyai dua buah lobang. Ia tidak mengetahui ke lobang mana Laila masuk. Sesudah mencari kesana kemari tidak bertemu ia keluar dan pintu gua tertutup. Ketika itu Muhammad Hanafiah melihat sebuah balai sudah berdiri lengkap dengan kolamnya. Airnya biru dengan batu-batu dan rumput yang indah. Disitu Muhammad Hanafiah menetap untuk selamanya.

**HIKAYAT
AMIR HASAN DAN AMIR HUSIN**

Bismillahi lon mula kalam
Ngon nama Tuhan zat nyang esa
Ngon nama Tuhan zat nyang kadim
Rahman rahim sifeuet mulia

Alhamdulillah Rabbil Alamin
Lon puji Tuhan Rabbussama
Beumula pujoe sikalian
Milek Tuhan Po nyang Esa

Tuhan peujeuet sigala alam
Jen ngon insan asoe donya
Dum lat batat asoe alam
Sidroe Tuhan dum nyang pana

Jeuneh batee didalam gle
Naleueng awe dalam donya
Apui angen neupeuhade
Dumpeue hase neukaronya

Sigala na dum lat batat
Allah nyang ahad bandum pana
Asoe laot asoe darat
Hana sisat buet Rabbana

Wajib ateueh dum sikalian
Sidroe Tuhan beutathee na
Lheueh lon pujoe Khalikul Alam
Seulaweuet lheueh nyan keu saidina

Seulaweuet saleuem ateueh Muhammad
Panghulee umat dum sineuna
Ya Tuhanku neutamah rahmat
Ateueh Muhammad saidil anbia

Ateueh wareh seureuta sahbat
Bandum umat nyang takwa
Lon mohon tulong bak hadarat
Nyoe hikayat lon calitra

Beutuhan bri troh ban hajat
Beuek tamat surat mulia
Buphui tuboh mangat asoe
Gaki jaroe jeuep anggeta

Lon mohon bak Tuhan sidroe
Dua nanggroe beuseujahtra
Beuek tamat lon seuleuah
Beureukat nambah ngon Aulia

Oh noe habeh nyoe khuteubah
Alkisah jinoe lon mula
Subhanallah walhamdulillah
ngo lon peugah saboh calitra

Lon calitra Hasan nogn Husin
Cuco jonjongan nabi kita
Ma Fatimah ayahneu Ali
Bandua mate-kafe enanya

Neumat keurajeueu nanggroe Madinah
Gantoe ayah Ali Murtala

Amir Hasan nyang mat peurintah
Di Madinah teupat neuraja

Raja Yazid aneuk Muawiyah
Mat peurintah di Meuse teuma
Ayah Yazid Muawiyah
Sahbat nyang leubeh nabi kita

Troh bak Yazid jeuet keu 'asi
Cuco nabi jienanya
Yazid keurajeuen nanggroe Meuse
Oh lheueh mate nyan ayahanda

Sabab jeuet pake deungon Hasan
Kareuna tuan lhee droe Nisa
Teuka Yazid lakee meukawen
Hana jitem ban lhee droe Nisa

Hana rila ureueng binoe
Nyan ban lhee droe hana suka
Sidroe nama Syari Banun
Dua geukheun Quraisy nama

Syari Banun roh meukawen
Deungon Husin nyang mulia
Ngon sabab nyan Yazid banci
Han jitukri mita bicara

Dalam ate jih saket that
Raja laknat darohaka
Hana jitukri mita ilah
Jikeumeung poh nyang mulia

Bak siuroe Yazid beurangkat
Deungon rakyat balatandra
Ngon peurasan le that bagoe
Dum sinaroe le that jiba

Nibak baho dum seunapang
Ladom gulam cokma raya
Sajan jidak dum sipai
Meuriti jikawai lingka

Deungon gaki dum jibalot
Oh teuot leumah u lua
Oh takalon sang teumakot
Ngon hitam that sang ngeue bangsa

Troh le Yazid bak saboh padang
Meurumpok ngon sidroe Nisa
Yazid tanyong bak inong nyan
Peue buet sinan po jroh rupa

Gamongteu pat namateu soe
Ka na lakoe nyak di gata
Ureueng binoe seuot rijang
Ulon tuan jak preh raja

Nama ulon Laila Meusyen
Ayah boh nan dilee mula
Judo ulon Saidina Hasan
Na neutuban wahe raja

Beukit meunan hai sambinoe
Tango haba kamoe sikrak haba
Saidina Hasan tapoh mate
Upah keudroe meuh sibahra

Laen nibak nyan meunyo tatem
Lon meukawen deungon gata
Ban jideungo narit meunan
Jitem yoh nyan laju sigra

Ureueng binoe iman laeh
Rijang jipateh buet cilaka
Phon dilee kon troh ngon jinoe
Inong lakoe nyoe bek peucaya

Oh dum lakoe ek jitem poh
Lagi lom jroh that mulia
Jimeututo dara pindoe
Angkat jaroe ateueh jeumala

Kru seumangat tuanku ampon

Cit hajat lon that keu gata
Cit that rindu lon baroe kon
Han troh reunong lon meuhila

Bak uroe nyoe ka troh lon mat
Kru seumangat tuanku raja
Meunan jikheun inong jalang
Tan pikeran nyan keu deesya

Nyan keu lakoe hana sayang
Dara jalang waba puta
Sabab Hasan dua isteuri
Teuka banci sicilaka

Laila Meusyen jikheun meunoe
Tabri keunoe racon tuba
Raja Yazid jijok racon
Laila Meusyen ate suka

Reconpi troh ubak jaroe
Laju jiwoe sicilaka
Oh sare troh u rumoh droe
Peuget jinoe laju sigra

Jiboh tuba bak makanan
Keu junjongan jamee lanja
Troh u romah Fatimah Zainab
Makanan mangat jikheun jiba

Fatimah Zainab that ceureudek
Narit meubalek muphon makna
Fatimah cok le neusimpan
Jiek hiram ngon ie muka

Saidina Hasan dalam meusjid
Neueh teungeut sikleb mata
Dalam teungeut leumah lumpoe
Nabi sidroe lahe nyata

Nabi neukheun ubak Hasan
Na makanan di rumoh gata
Pajoh makanan bungong pade
Bek syok ate pajoh tuba

Lheueh nibak nyan Hasan teukeujot
Ie mata sret meulumba-lumba
Lheueh nyan teuma beudoh laju
Jak bak kubu nabi mulia

Hasan tamong bak kubu nabi
Jalan gaki phon neuteuka
Teuma neujak teuntang pusat
Troh neupeurab bak keupala

Ie mata sret dum meutaloe
Ingat keudroe dalam bahya
Tanoh bak kubu neucok seureugam
Neuboh u dalam bajee raya

Lheueh nyan neuduek neuleueng paleuet
Baca seulaweuet tanbeh nama
Neupeujok droe ubak Tuhan
Ngon jonjongan nyang mulia

Hana neusyen deungon insan
Meulainkan nyang hukum Esa
Teuma neurahob le ngon jaroe
Hasan neuwoe u rumoh tangga

Oh sare troh Hasan u rumoh
Neuhei Fatimah laju sigra
Hai judo lon Fatimah Zainab
Lon amanat ubak gata

Lon uroe nyoe ka teukeudi
Sampoe janji Tuhan nyang Esa
Tinggai gata hai puteh di
Lon keumbali nanggroe baka

Dua peukara puteh lumat
Beu taingat jeuep kutika
Jeuep-jeuep watee jeuep-jeuep saat
Beu taingat cahya mata

Nyang peutama ingat keu Tuhan
Beurangkajan bek talupa

Nyang keu dua ingat keu mate
Pajan tacre saleh ngon donya

Dilon hai judo ka mate
Uroe nyoe cre lon ngon gata
Makanan peue bunoe jiintat
Tabri leugat lon meung rasa

Fatimah Zainab jaweueb rijang
Yoh nyan neutham pantah sigra
Bek tuanku pajoh makanan
Didalam nyan ka jiboh tuba

Bek takheun nyan hai boh ate
Bandum mate nyang meunyawa
Nyang meunapah bandum mate
Maut sare sama rata

Fatimah Zainab jok makanan
Neukheun yoh nyan ngon ie mata
Tapajoh dua hai jonjongan
Bahle sajan mate pana

Teuma seuot saidina Hasan
Hai intan bek dilee gata
Ajai gata manotng jeuoh
Cit goh lom troh nibak masa

Bek neupajoh gata sajan
Tinggai Hasyim nyang mulia
Fatimah hai bukon bubarang
Hai jonjongan tanglong donya

Neubri idin judo payong
Lon eh lam lumueng sikleb mata
Lon peulheueh meusyen bak uroe nyoe
Tuanku neuwoe nanggroe baka

Fatimah eh dalam lumueng
Deungon Hasyim sajan dua
Ie mata ro meukuboh-kuboh
Hai Hasyim jroh tinggai gata

Saidina Hasan neumoe limpah
Lon paban bah ka troh masa
Wahe aneuk tangke ata
Uroe nyoe cre lon ngon gata

Sira neumoe sira neucom
Hai aneuk lon cahya mata
Tabri idin hai boh ate
Lon jinoo cre deungon gata

Sideh lon preh bak ulee titi
Gata ngon umi sajan dua
Lheueh nibak nyan saidina Hasan
Pajoh makanan deungon sigra

Oh lheueh neupajoh tutong badan
Muntah yoh nyan le keulua
Hasan neukheun bak Fatimah
Aneuk lidah tapeulara

Harap ulon bek tadhoh-dhot
Jih mantong cut goh lom raya
Aneuk manyak hana le dua
Beuna taeu siblah mata

Lon uroe nyoe sampoe janji
Hai puteh di tinggai gata
Tatanom lon rab kubu nabi
Hai puteh di bek talupa

Meunan neukheun bak Fatimah
Neuamanah dum peukara
Yoh neukheun nyan muntah darah
Hana teudoh sikleb mata

Fatimah deungo dum peuneugah
Peunoh limpah neumoe rukha
Droe cit ka ngon kheundak Allah
Habeu langkah dalam donya

Tujoh buleuen neumat keurajauen
Kheundak Tuhan maut teuka

Fatimah moe bukon bubarang
Sabab jonjongan jadeh bungka

Ingat naseb ngon ka untong
Hokeu roh lon oh tan gata
Saleh pakri saleh paban
E jonjongan han le gata

Oh teuringat keu guna Hasan
Sang beu sajan lam keureunda
Rasa mate siblah badan
That neusayang keu judonya

Saidina Hasan neumoe limpah
Habeu basah bajee ija
Hai tuanku lon paban bah
Kheundak Allah Rabbul a'la

Tinggai lon sidroe lam donya nyoe
Droe nyan ka neuwoe u nanggroe baka
Dilikot gata saleh pakri
Kheundak Rabbi ateueh hamba

Sayang neumoe Amir Husin
Ureueng laen moe dum rata
Asoe rumoh Rasulullah
Moe dum limpah tuha muda

Teuka kaum dum sinaroe
Geuseumanoe Hasan mulia
Lheueh seumanoe boh lam kafan
Ngon bee-beean minyeuk ata

Jeuneh keumeunyan ngon kheulumbak
Bee meuhayak hana tara
Oh lheueh cukup dum sikalian
Geupasoe rijang lam keureunda

Lheueh nibak nyan geuseumbahyang
Lakee bak Tuhan beuseujahtra
Teuma geuboh lam liang lahad
Nyankeu teupat keukai baka

Saidina Hasan oh nan teutap
Habeu hayu dalam donya
Wafat Hasan tinggai Husin
Neukeurajeuen gantoe seedara

Husin keurajeuen nanggroeu Madina
Rupa ceudah sang purnama
Kulet putih sang bungong meulu
Ate rindu soe ngieng rupa

Takue panyang sang geularek
Gigoe leuntek dum keu jangka
Muka buju seudang baek
Ngon ceureudek bijaksana

Oh panyang that troh u gaki
Meukilat ri hu meucahya
Peukayan neungui nibak badan
Bandum seunalen nibak raja

Hukum ade seudek sasat
Hana sapat meung enanya
Ureueng inong neuyue tob ulee
Dum neubri thee jeuep peutua

Pat-pat nyang na inong balee
Neubri bajee deungon ija
Laen nibak nyan aneuk yatim
Bandum seunalen nibak raja

Ureueng nanggroeu mangat ate
Raja de mubahgia
Alhamdulillah pujoe keu Tuhan
Teuduek oh nan siat haba

Raja Yazid nanggroeu Meuse
Teuka pike dalam dada
Jideungo Husin sangat ade
Saket ate hana tara

Teuka banci dalam ate
Raja kafe tan bicara

Teuma jipangge Marwan Hakim
Sabab gob nyan guree raja

Wahe teungku Marwan Hakim
Husin kupeulenteu bicara
Lon keumeung prang Amir Husin
Bah tapeulen jinoo sigra

Pakri macam ngon tailah
Nanggroe Madinah bek binasa
Beukit taprang ngon tagagah
Han ek leupah bak lon kira

Sabab sinan kubu nabi
Han ek ungi barangjan masa
Meunyo ho laen siat hase
Husin mate sikleb mata

Meunan narit raja asee
Seuot guree nyang cilaka
Deelat ampon buet nyoe mudah
Le that ilah nibak-hamba

Jinoo tuanku rakyat takrah
Dum kafilah balatandra
Jeuet ulon jak u Madinah
Lon jak peugah tipee daya

Raya Husin lon yue minah
U nanggroe Kufah mangat tangaza
Raja Yazid yue krah rakyat
Yue meusapat dum sineuna

Jiyue himpun dumna rakyat
Marwan laknat laju bungka
Laju jijak u Madinah
Lankat Allah that cilaka

Padum uroe peujalanan
Troh Marwan bak saidina
Ban sare troh mumat jaroe
Jiduek keudroe peugah haba

Marwan Hakim laknat Allah
Boh ie babah nibak mata
Angkat jaroe ateueh ulee
Hakim asee peugah haba

Tanda yakin lon panghulee
Ulon bri thee saboh rasia
Tadeungo lon wahe saidi
Yazid banci that keu gata

Meunyo tuanku surot sinoe
Meunan bagoe nyang seujahtra
Musin deungo Marwan kheun
Na sang hujeuen ro ie mata

Kakeu meunan grak bak Tuhan
Sapeuepi tan le neukira
Hana sapeue teuka pikeran
Teukeudi Tuhan Po nyang Esa

Wahe Marwan pakri ilah
Nyang ek leupah nibak bahaya
Jaweueb Marwan laknat Allah
Haba jipeugah le meubura

Nyang get tuanku neujak u Kufah
Keudeh minah po meukuta
Ureueng Kufah jeuet ban neukheun
Yakin bandum jih keu gata

Insya Allah Husin neukheun
Singoh ulon laju bungka
Bak masa nyan saidina Husin
Dum neuyue tren balatandra

Tunong baroh timu barat
Dum meusapat tuha muda
Rakyat Husin nyang meuteuntee
Tujoh ploh ribee cut ngon raya

Kutika nyan ka meusapat
Deungon alat ban sikada

Tuanta Husin neubeurangkat
Deungon rakyat dum sineuna

Padum uroe peujalanan
Troh meuriwang u Karbala
Troh bak padang blang nyang luah
Peuget kimah yoh nyan sigra

Saidina Husin woe u Kufah
Rakyat bahrullah sajan neuba
Cukop kimah ngon bantayan
Piyoh sinan tuha muda

Baro geudong tho ngon reuoh
Leumah jeuoh angkatan raja
Ngon pahlawan that bahrullah
Guda gajah han ek kira

Le that rakyat meulaksa ribee
Kafe asee that angkara
Troh le keunan beuhadapan
Didalam blang u Karbala

Jipeudong kimah dum meureuntang
Dum pasukan raja-raja
Tujoh ploh ribee tamon rakyat
Maseng pangkat dum keupala

Rakyat Yazid that beurani
Biek Habsyi hitam sukla
Ureueng Iseulam that gurangsang
Jilakee cang tandra raja

Ubak Husin lakee idin
Neuleueng amin lakee doa
Saidina Husin neubri idin
Deungon yakin han syok sangga

Neupeujok droe ubak Tuhan
Seureuta rakan tuha muda
Tajak rakan beuseulamat
Raja Yazid musoh gata

Yakin ate lawan kafe
Rabbul kade bri syurga
Oh lheueh idin laju meulangkah
Dua kafilah mahaduka

Jipeh geundrang ngon geudumbak
Deumpek surak that meutaga
Peh ngon canang yub seuruni
Jroh meuriti ban silingka

Ureueng Iseulam that beurani
Ek meuriti jroh meubanja
Geupéh geundrang yub napiri
Meui-i ngon sangkakala

Yakin ate bak prang sabi
Tan sikali duka cita
Deumpek surak meualon-alon
Sang bakat tron dimieng kual

Tandra Yazidpi ka jiek
Jideumpek sang reuloh donya
Sideh saban sinoe sakri
Sang-sang reule alam donya

Lheueh busu bleuet ngon ali-ali
Jinari geusyik panglima
Keudeh keunoe jimeutangkeh
Rakyat teueh dum meukeuba

Sideh sinoe that beurani
Geucang kafe yakin raya
Ureueng Iseulam that beurani
Jimeutadi deungon cokma

Kafe mate rab siteungoh
Laen meh moh laju teuka
Le that mate kafe bajeueng
Hana leueung laen teuka

Suara cokma that meuguncang
Su geudubang sang rapana

Suara beude that meugrum-grum
Sang ujeuen musem kuenong sa

La gee bunyoe angen tufeu
Le that ureueng mate pana
Kafe reubah leum leum
Maken seum laen teuka

Surak deumpek that meualon
Sang bakat tren hana reuda
Binatang gle dum teumakot
Sangat ribut lam blang raya

Ureueng Iseulam hana surot
Laju geulob dalam tandra
Suara peudeueng leubab leubub
Nyang maut sinan teuhanta

Tandra Yazid mate le that
Miseue lalat bak umpama
Rakyat mate han teupeugah
Nyang patah han ek takira

Miseue ie krueng ile darah
Subhanallah rakyat pana
Ureueng syahid pihak Iseulam
Didalam prang lam blang raya

Pihak Iseulampi le syahid
Tandra Yazid han ek kira
Mate siploh teuka sireutoh
Kafe biyoh sangat that bha

Husin kalon rakan syahid
Moe meureb-reb ngon ie mata
Beudoh Wahab teuma pantah
Pahlawan meugah dalam tandra

Lakee idin ubak Husin
Hai jonjongan idin keu hamba
Idin keu lon hai panghulee
Lon poh sitree musoh kita

Saidina Husin lalu idin
Wahab sajan neuba ngon ma
Aneuk peurumoh aduen adoe
Aneuk kumuen droe dum seureuta

Mangat ate sikalian
Geujak lawan sitree dumna
Wahab teubiet le neulalu
Neujak laju lam prang raya

Insya Allah tulong kudrat
Ngon mukjizat nabi Mustafa
Uroe nyoekeu bandum kupoh
Han kukeubah tuha muda

Kafe deungo haba Wahab
Laju jirapat ban silingka
Wahab kalon kafe laknat
Neugrak leugat peudeueng raya

Neukoh takue neukoh lihe
Kafe mate reubah meutimpa
Sigo saho neualek peudeueng
Ka teugageueng seun-seun dua

Wahab neugrob meudhoi abee
Neucang sitree dum meukeuba
Ladom nyang na beukah ulee
Ladom singkee putoh dua

Le that mate kafe sitree
Meuree-ree laen lom teuka
Wahab neugrob hana padee
Neucang sitree bak-bak muka

Wie ngon uneun Wahab neugrob
Leubab leubub peudeueng seuba
Meung sigentu hana sangkot
Wahab neugrob sangat caca

Aneuk peurumoh mate sajan
Kafe neucang hana reuda

Phone beungoh kon troh cot uroe
Leumah asoe Wahab muda

Sang han ek le neugrak peudeueng
Tho ngon rukueng iepi hana
Uroe tarek kon bubarang
Leumah badan Wahab muda

Kafe kalon sang ka keundo
Laju jitajo ban silingka
Laju jihudom ka jirapat
Jihadap gajah ngon guda

Ka troh watee bak hadarat
Habeh hayat dalam donya
Wahab syahid le disinan
Tatkala nyan tinggai donya

Aneuk peurumohpi ka mate
Bandum sare asoe syurga
Keudeungaran ubak Husin
Sangat neusyen hana tara

Saidina Husin yoh nyan neumoe
Sang neumanoe ro ie mata
Wahe Wahab nyang meutuah
Gata leupah nanggroe baka

Beu Tuhan bri nikmat limpah
Syurga indah nikmat keu gata
Uroe akhirat oh meuhimpun
Sideh tapreh lon di blang mahsya

Oh tan gata wahe Wahab
Hana le pat lon meurasia
Hana pat le lon peugah lumpoe
Lagee uroe nyoe nyang that seungsara

Lon paban bah grak hadarat
Wahe Wahab nyang seutia
Gata tajak beuseulamat
Lon dilikot nibak gata

Padum na treb teuma dudoe
Kafe pindoe that angkara
Jipeh geundrang macam-macam
Aneuk Hasan lakee ngaza

Aneuk Hasan nama Hasyim
Tatkala nyan beudoh sigra
Idin keu lon hai jonjongan
Lon jak lawan sitree dum na

Seuot laju Amir Husin
Gata kuchen bijeh mata
Piyoh dilee bungong geutoe
Goh lom sampoe bak kutika

Goh lom troh hat bak tamuprang
Gata alang bijeh mata
Jaweueb Hasyim hai jonjongan
Lon bek neutham teungku apa

Cut ngon raya wahe ayah
Poteu Allah nyang bri kuasa
Buet geundubang hai ya gani
Han jituri cut ngon raya

Peurlu ain buet prang sabi
Bek sikali neutham hamba
Wahe aneuk bungong pade
Putoh ate beukah rasa

Beukit meunan hai boh ati
Jak bak umi deungon mama
Talakee idin wahe intan
Tajak lam prang lawan ngaza

Hasyim deungon mangat ate
Ka tajak le ubak bunda
Oh troh keunan neuseumah le
Teuot umi deungon mama

Wahe masyik deungon umi
Idin neubri keu aneukda

Neubri idin lok jak lam prang
Ulon lawan musoh teuka.

Fatimah Zainab yoh nyan neumoe
Bandua droe ro ie mata
Wahe aneuk boh ate nang
Tajak lam prang goh mumada

Gata aneuk mantong alang
Bek tamuprang dilee gata
Seuot Hasyim lon bek neutham
Hai ma badan tinggai gata

Tuan Fatimah neumoe limpah
Kupabanbah boh ate ma
Tajak aneuk beuseulamat
Bak hadarat kupeujok gata

Hasyim teubiet laju ublang
U mideuen prang nyang kucinta
Pasang guda muda seudang
U mideuen prang neupoh lawa

Ban neukalon musoh le that
Neusuet leugat peudeueng raya
Peudeueng leupah u lau sarong
Neukeupong musuh cilaka

Neucang kafe meuseueng abeueng
Neutak rincong seun-seun dua
Dum pahlawan nyang tanggoh-tanggoh
Peudeueng pajoh dum meukeuba

Hasyim pagab tunong baroh
Hasyim bunuh' ngon peudeueng raya
Phon beungoh kon troh cot uroe
Hasyim eumpoe hana reuda

Grak teukeudi nibak Tuhan
Leumah badan Hasyim muda
Beukah ate oh taingat
Dahga sangat iepi hana

Ka troh watee kheundak Tuhan
Jitob Hasyim ubak dada
Ateueh gada sret u bumoe
Sitree peutoe keunan sigra

Hasyim Syahid Fatimah moe
Ban neumanoe ro ie mata
Wahe aneuk tangka ate
Gata han le tinggai maha

Teungoh galak lon keu gata intan
E hai Hasyim tatinggai ma
Allah hai po ilahul hak
Hokeu lon jak ya Rabbana

Beukah ate oh lon ingat
Puteh lumat boh ate ma
Wahe aneuk muda seudang
Syahid di blang u Karbala

Tatinggai ma ate bimbang
Gata intan ka teubungka
Tapreh ulon bak ulee titi
Uroe page di Padang Mahsya

Oh noe habeh haba bae
Mèunyo that le hana laba
Meung bek putoh lon boh bacut
Kadang ek jeuet keu seumpeuna

Jinoe beudoh aneuk Husin
Nama geukheun Ali Akbar
Laju geujak ubak umi
Geupeugah le ban nyang cinta

Deungo kamoe wahe umi
Idin neubri lon jak ngaza
Lon jak lawan raja Yazid
Sitree bit-bit raja jak ka

Ban geudeungo meunan neukheun
Syari Banun ro ie mata

Wahé aneuk bungong seumpeueng
Cahya buleuen boh ate ma

Bek hai aneuk jantung ate
Han ulon bri tajak ngaza
Gata aneuk mantong keucek
Lawan kafe han mumada

Ali Akbar jawueb yoh nyan
Lon bek neutham wahé bunda
Lon duek lon dong hana mangat
Musoh le that laju teuka

Hai ma neumat bak hakikat
Ban hukum zat Tuhan nyang Esa
Hudep mate hukum hadarat
Bek panyang that le neukira

Wahé aneuk jantung ate
Ban tapike bujeh mata
Adat lon tham han tapateh
Meunoe meudeh tameudawa

Jinoe aneuk idin kubri
Hai boh ate cahya mate
Gata lon jok ubak Rabbi
Nyang that gani maha kuasa

Tajak aneuk bak prang sabi
Hukum Rabbi dum peukara
Ali Akbar neubeudoh le
Neuseumah umi deungon maha

Oh lheueh idin nibak ayah
Neuek pantah ateueh guda
Neupoh lawa guda tiji
Jititi u padang raya

Raja Yazid tamon syaukah
Nam ribee kimah nyang raya-raya
Ali Akbar sampoe u blang
Ho neupandang angkatan raja

Rakyat le that han peue peugah
Sabhanallah han ek kira
Bipti meunan hana ugh
Neulob pantah lam kawan raya

Neusuet peudeueng dalam sarong
Neukeupong u teungoh laksa
Nyang ladom kliek meuseueng abeueng
Jaroe puntong ulee hana

Ali Akbar that guransang
Kafe neucang dum meukeuba
Soe meuteumeung bandum simpan
Ali seudang that peukasa

Darah ile sang ie kubang
Tangkurak sang bruek lam raga
Kafe jiplueng cula caloe
Ali sidroe neucang lanja

Pat meusuara keunan neulet
Neuhapit ngon peudeueng raya
Amir Husin mat bak jaroe
Preh samlakoe sikutika

Buet geudubang bek that gagah
Oh ka payah kureueng teuga
Ali Akbar bit that payah
Apoh apah hana tara

Nibak Husin euncien saboh
Seumeuloh jroh that meucahya
Neusuet bak jaroe euncien khalifah
Neuboh lam babah Ali Akbar

Oh lheueh neuboh euncien lam babah
Hana le grah sijuek lam dada
Oh lheueh piyoh na sikeujab
Sitree pagab ban silingka

Ali Akbar seumbah Husin
Lakee idin neujak ngaza

Amir Husin idin rijang
Muda seudang ek cong guda

Neulet kafe tunong baroh
Neubunuh ngon peudeueng raya
Beukah ulee takue putoh
Seun-seun siploh dum binasa

Ho neuhadap habeh ranab
Kafe laknat mate meukeuba
Peudeueng raya neuseumangat
Kafe laknat dum binasa

Bitpi le that nyang ka mate
Jiek a sare sang seurangga
Taeu putoh dum meukhan-khan
Didalam blang dum meukeuba

Neucang kafe hampe siteungoh
Badan leumoh uroe that kha
Ka troh tanggoh nibak Rabbi
Syahid Ali lam blang raya

Ali jitob nibak badan
Keunong simban nibak dada
Ali Akbar syahid lam prang
Husin pandang ro ie mata

Wahe aneuk jantung ate
Gatahan le ka neubungka
Lon nyang tinggai saleh pakri
Hukum Rabbi ban nyang kada

Hukum Allah maha suci
Peue nyang neubri syukur neuba
Ali Akbar syahid lam prang
Masyik ngon nang ro ei mata

Wahe aneuk jantung ate
Gatahan le ka tinggai donya
Oh lan ingat that meusampe
Hana pat le meuen mata ma

Masa bunoe tulak umi
Sabab han kubri tajak ngaza
Wahe aneuk nyang juhari
Ka troh janji Tuhan Nyang Esa

Ku pabanbah hai boh ate
Hak teukeudi buet Rabbana
Barangkapeue han le hase
Rabbul kade nyang kuasa

Hana daya deungon hilah
Hukum Allah ateueh hamba
Laba rugoe saket mangat
Buet hadarat han troh juga

Alhamdulillah pujoe keu Tuhan
Muwoe karangan laen punca
Ammabakdu keumudian lagi
Ulon rawi Husin jinoe

Amir Husin beutaturi
Cuco nabi panghulee geutanyoe
Rupa indah ban buleuen trang
Soe nyang pandang mata silo

Sang meuh seupoh cahya badan
Seumeuloh ban miseue uroe
Keuieng leunteng indah han ban
Baho keumang jroh han bagoe

Takue panyang sang geularek
Jroh that leuntek taeu gigoe
Paleuet jaroe ban on buni
Paleuet kaki miseue pudoe

Miengneu dua jroh that ingen
Sang ceureumen jeuet talhoh droe
Ceudah rupa saidina Husin
Hana bandeng dalam nanggroe

Saidina Husin duek lam kimah
Ngon jeumaah nyang kaum droe

Bak masa nyan sitree le that
Ka jipeurab keunan jipeutoe

Ngon jisurak meualin-alin
Saidina Husin peukeumah droe
Neungieng sitree dum ka keunan
Saidina Husin neukheun meunoe

Tadeungo lon wahe Nisa
Idin gata dum keu kamoe
Bak masa nyoe lon masok prang
Ku lawan kafe sinaroe

Rakyat tan le aneukkupi tan
Peue seulindan keu donya nyoe
Bak uroe nyoe masok prang
Idin intan keu lon jinoe

Teuma beudoh Syari Banun
Jok peukayan keu judo droe
Amir husin ngui peukayan
Seuleungkapan dum sinaroe

Oh lheueh neungui alat keu rajeuen
Leubeh bak beleuen peuet blah uroe
Neusok euncien Khalifah Allah
Lom meutamah indah han soe

Lheueh nibak nyan Saidina Husin
Neubri ajaran keu ureueng binoe
Idin keu lon hai bungong pade
Kuprang kafe bak uroe nyoe

Lon uroe nyoe keumasok prang
Gata intang tinggai sinoe
Talakee tulong nibak Tuhan
Page peutang bek na sunyoe

Tamohon doa nibak Allah
Beuek leupah bak bahya nyoe
Beukit syahid lon dalam prang
Gata intan ingat keudroe

Talakee tulong ubak Rabbi
Bak tuanta Ali ayah kamoé
Beukit jiba le Yazid paleh
Bek tapateh jipeurunoe

Bek tapateh buet nyang karot
Tuhan neutot uroe dudoe
Bak uroe ka cre ulon
Keusudahan lon peurunoe

Meung cre jinoe meuteumeung page
Oh lheueh mate meuteumeung dudoe
Meunan sabda Amir Husin
Jimoe bandum ureueng binoe

Asoe rumoh Rasulullah
Reubah limpah dum sinaroe
Di ujong u hu sang bintang
Siulah sang intan pudoe

Troh u gaki panyang sya'ran
Sang-sang intan blet-blet cahya nyoe
Amir Husin neuk kandran
Rakyat pangsang dum sinaroe

Nama guda Zuljarami
That ugahri hana bagoe
Lheueh nibak nyan neubri saleuem
Sira neukheun sira neumoe

Ka troh ban hak kheundak Allah
Neumeulangkah u blang jinoe
Oh sare troh Husin u blang
Ka neupandang rakyat meukatoe

Saidina Husin hana sangsi
Ubak Rabbi neupeujok droe
Teuma neusuet le ngon peudeueng
Kafe bajeueng laju neukiloe

Beukah ulee beukah muka
Seun-seun dua nyawong sampoe

Ladom rakan keunong bak lhong
Nyang that untong keunong jaroe

Kafe mate meuseueng abeueng
Dum teupengkeueng sideh sinoe
Le that mate dum meukeuba
Allah Taala nyang thee sidroe

Barangkasoe han troh juga
Sifeuet hamba meunan bagoe
Zuljarami lagee kilat
Oh jilumpat pantah han soe

Kafe mate dum meulipat
Bangke le that dum teupipoe
U timu sigo neulumpat
U barat sigo neukiloe

Le that kafe habeh hayat
Guda lumpat pantah han soe
Han ek jitheun bandum jiplueng
Han le ureuengpi meuang sidroe

Yazid tanyong pakon keplueng
Geutanyoe dum musoh ka toe
Raja Yazid tahe hireuen
Jieu ureueng plueng meukatoe

Hana laen saboh ureueng
Pakon kaplueng cula caloe
Han ka ingat keu guna kee
Bit sang asekeu sinaroe

Meung sigeutu hana malee
Aneuk asee han get budhoe
Nyang na muboh ube-be alee
Hana lagee geusuen tuloe

Han sigeutu ingat keu guna
Geusyih peuta imam sagoe
Saboh keubeue bubri dua
Nyang keupala saboh sidroe

Aneuk peurumoh dum kukira
Bajee ija bandum kubloe
Dumnan dikee rugoe hareuta
Bak kusangka ek meugantoe

Husin sidroekeu meulaksa
Kaplueg lanja lam-lam duroe
Han ka ingat jeuheuet nama
Bit peucuma wazi meuntroe

Keu peue guna geusyih panglima
Bandum tandra habeh paloe
Lasyka geutanyoe dum bahrullah
Husin jicah geunap uroe

Jaweueb rakyat hai meukuta
Le that tandra ajai sampoe
Oh ban sare talet lingka
Tajam raya bak jiseudoe

Bak kawan jih ban meudieueng
Ka meuseumbeueng bak kawan nyoe
Han tom lon eu meunan ureueng
Lagee Husin tajam han soe

Taeu reubah dum teukakeueng
Putoh rukueng putoh jaroe
Aneuk Ali sang rimueng bueh
Han jipeulheueh barangkasoe

Husin utoh sangat cagak
Han jan meurab ka jikiloe
Deungon gudapi tajam that
Na ban kilat malam baroe

Han jan taeu ka meulipat
Tajam jithat hana bagoe
Dumna rakyat dum teukakeueng
Reubah kengkeueng teuhieng gigoe

Nyankeu sabab kamoe undo
Tahe gante dum barangsoe

Raja Yazid beungeh jithat
Jikrah rakyat dalam nanggroe

Tunong baroh timu barat
Meusapat bak raja pindoe
Raja Yazid buka bicara
Hai panglima wazi meuntroe

Sia-sia kupeulara
Ladom gata kubri sagoe
Nibak gasien kupeukaya
Kubri hareuta dum sinaroe

Meuang bacut tan na manfaat
Nyang na meularat ateueh kamoe
Hareuta habeh ate ku saket
Tan meung ube phet laba kamoe

Tapeumalee kamoe raja
Bacut hana timoh budoe
Baek meuntroe ngon bintang
Dan peutua nyang mat sagoe

Dum pahlawan taeu jroh-jroh
Tan meusaboh nyang na keumiroe
Sidroe ureueng han ek kapoh
Nyang na muboh brat lhee katoe

Meunan jikheun uleh raja
Beungeh tandra dum sinaroe
Jibeudoh le dum jilumpat
Gurangsang that aneuk bisoe

Leugat u blang dum jihila
Jijak mita Husin sidroe
Saidina Husin cit ka di blang
Ubak Tuhan neupeujok droe

Kafe bajeueng lom jipeusak
Jisurak sang reuloh nanggroe
Taeu jigrob le jilikak
Kage batat seuu asoe

Saidina Husin neusuet peudeueng
Neutimpeueng cong guda rago
Guda lumpat neugrak peudeueng
Kafe bajeueng dum neutusoe

Taeu reubah dum teukakeueng
Keunong peudeueng Husin sidroe
Wie ngon uneun Husin neugrob
Leubab leubub musoh neukiloe

Dalam kawan laju neulob
Tadeungo ob peudeueng seudoe
Zuljarami guda rancak
Dum jisipak kafe pindoe

Mate sinan le teukeupak
Ladom rusak patah jaroe
Ladaom mate ladom rusak
Guda sipak peudeueng seudoe

Kafe mate that meubulak
Nyang rusak han peue kheun proe
Darah ile ban saboh blang
Hu meukeumang mirah bumoe

Bruek tangkurak taeu kengkeueng
Ka teukakeueng jeuep-jeuep sago
Le that mate kafe suang
Husin neucang hana padoe

Guda sipak hana reunggang
Husin neucangpi tan sunyoe
Ulee putoh dum meutabu
Ladom taeu han le jaroe

Kafe jiplueng that meuu—u
Husin eumpu hana bago
Nyang sayang that neucang bak plueng
Ka teukakeuang ajai sampoe

Ladom jilob u dalam krueng
Dalam reuleueng jijak som droe

Le that mate kafe bajeueng
Hana leueung Husin cakcoe

Raja Yazid beungeh jithat
Jitheun rakyat dum sinaroe
Keu guna kee han ka ingat
Kubri nikmat geunap uroe

Peukayan jroh ladom kubri
Ladom neugri ladom sagoe
Ladom kubri kulahkama
Meuh peurmata intan pudoe

Kukira ek geutob nama
Dikah hana ingat budoe
Macam-macam nikmat kubri
Pangkat tinggi meubagoe-bagoe

Tan meusoe-soe nikmat kubri
Meung aneuk si geutob tampoe
Husin sidroekeu meulaksa
Ek kabungkan dum kaboh droe

Jinoe bek le ka meungaza
Bandum gata beudaoh jak woe
Bel le taikot kamoe raja
Ube nyang ka bandum rugoe

Habeh haba raja pindoe
Peukeumah droe teuma jinoe
Sare jieu raja meukeumah
Jaweub pantah sidroe meutroe

Deelat ampoh duli khalifah
Ampon meuah dumna kamoe
Bek tuanku tajak lam prang
Uleebalang goh lom sampoe

Meunyo tuanku neujak lam prang
Peue gunaan wazi meuntroe
Teutapi kamoe jinoe peutrang
Syahli alam neukheun jinoe

Amir Husin meunyo neupoh
Uroe singoh that meupaloe
Meunyo mate Amir Husin
Teuka laen nyang buta tuloe

Beuna takot tuanku droe
Buet nyoe teuma raya dudoe
Soh ngon nanggroe rakyat pana
Raja-raja nyawong sampoe

Teuma jawueb Yazid cilaka
Peukeu kira keu buet dudoe
Phui deungon brat cut ngon raya
Ek kusangga barangkasoe

Meunan narit nibak raja
Beudoh tandra dum sinaroe
Dum jiteubiet u blang raya
Jijak mita Husin sidroe

Tatkala nyan Saidina Husin
Ngon syuruban teungoh neupot droe
Oh takalon teuka sayang
Oh tapandang sidroe beutoe

Husin kalon musoh datang
Peudeueng rijang mat u jaroe
Ateueh guda le neupasang
Lumpat rijang guda ragoe

Tajo laju dalam kawan
Sitree neucang dum neueumpoe
Zuljarami guda analan
Jiteureujang kafe pindoe

Kafe asee le that mate
Buet Zuljarami guda ragoe
Rakyat mate dum meugule
Jiteubiet le meuribee katoe

Leubeh siploh seun meutamon rakyat
Meutingkat-tingkat leubeh bak baroe

Oh habeh nyan teuka laen
Maken masen nibak bunoe

Saidina Husin bagoe ribot
Neucang hat hot kafe pindoe
Lam mideuen prang kalang kabot
Sang ka seupot seunja uroe

Ali-ali ngon busu bleuet
Siat-at dum aret ateueh bumoe
Tatkala nyan Saidina Husin
Hana neungieng keudeh keunoe

Wie ngon uneun tan neupaleng
Saidina Husin beungeh tuloe
Ka troh janji bak hadarat
Habeh hayat Husin sidroe

Meunan teukeudi bak hadarat
Habeh hayat lam donya nyoe
Nibak dada keunong busu bleuet
Ka teusureuet sret u bumoe

Saidina Husin sret meugule
Mangat ate kafe pindoe
Dum meuron-ron jipeurab kafe
Jihudim le siseun keunoe

Nyang giduek nyan Sam Daif
Ureueng leubeh dagang pindoe
Amir Husin tanyong pantah
Soe namakeu peugah jinoo

Nama ulon Sam Daif
Deungon beugeh jihareutoe
Bethat beutui ban kapeugah
Dada peuhah lon eu jinoo

Sam Daif peuhah dada
Leumah nyata mom meupadoe
Nibak dada mom sang asee
Nabi kheun dilèe yoh saboh roe

Masa hayat Rasulallah
Ka neupeugah bak cuco droe
Sare leumah neuueu tanda
Neupet mata ka neuuem droe

Dalam ate ingat kalimah
Droe nyan sudah ajai sampoe
Jikoh takue Amir Husin
Hana jichen dagang pindoe

Ka teukeudi nibak Allah
Habeah langkah lam donya nyoe
Jih jisalen uleh Yazid
Bintang blet-blet dum sinaroe

Mangat ate raja Yazid
Sam Daif get jiseuboe
Husin teutiek sinan di blang
Rakanpi tan meung sidroe

Meunan teukeudi nibak Tuhan
Tinggai badan sidroe jatoe
Teuma teuka sidroe ureueng
Ubak Husin ka jipeutoe

Oh troh keunan ubak Husin
Leumah euncien nibak jaroe
Jisuet euncien ngon sigra le
Galak ate hana bagoe

Teuma leumah dalam pike
Jimeurawe meudeh meunoe
Oh lheueh kucok manikamnyoe
Hana kungui bah kupubloe

Kupajoh ngon keunguipi han habeah
Meusigo leubeh umu nanggroe
Meunan ingat nyang na leumah
Dagang paleh han thee keudroe

Lheueh nyan teuma jimeukeumah
Buet bideuah peulakee jinoe

Jisuet sikin aneuk biyoh
Jikoh putoh aneuk jaroe

Tapaban bah kheundak Allah
Ohnoe tuah Husin sidroe
Salatin nama jih nyan
Dagang jahanam han thee keudroe

Kuasa Tuhan limpah kudrat
Malaikat keunan sampoe
Neutampa muka dagang laknat
Reubah leugat le teupipoe

Reubah sinan laju pangsan
Selatin dagang pindoe
Habeu umu jih masa nyan
Teutiek sinan ka teupipoe

Tren di langet dum Malaikat
Geume reuhab suci han soe
Ngon peuratah bantai suson
Meukasab eumbon jroh han bagoe

Gahru jeumpa ngon keusturi
Malaikat me keunan sampoe
Mulia that Saidina Husin
Arwah tren dum u bumoe

Adam ngon Nuh Musa kalim
Ngon Ibrahim sajan peuet droe
Malaikat bandum sajan
Ngon peurasan meribee bagoe

Ie Kalkausat ngon ie Zamzam
Saidina Husin geuseumanoe
Rasulullahpi beurangkat
Deungon sahbat peuet limong droe

Geueu mayet Saidina Husin
Ulee puntong deungon jaroe
Ulee han le jaroepi tan
Kheundak Tuhan Poteu sidroe

Saidina Ali beungeh han ban
Neueu Husin meunan bagoe
Ali meulakee seumbah nabi
Idin ya saidi hudep lon nyoe

Lon tueng bila Hasan ngon Husin
Yazid lon peulaen bak uroe nyoe
Stree Tuhan lon peukeumah
Kuta lon reulaoh ngon meuligoe

Ya Rasulullah idin lon hudep
Adat han treb meung siuroe
Teuma jaweueb uleh nabi
Wahe Ali deungo kamoe

Ureueng mate han le hudep
Meung goh lom seb umu nanggroe
Beuta saba wahe Ali
Tuhan Rabbi po geutanyoe

Hasan Husin dalam rahmah
Sitree geuajab uroe page
Lon piyoh siat haba Husin
Jinoe laen lon peugah proe

Zuljarami nyang analan
Guda kandrean Husin sidroe
Nyankeu guda seutiaan
Didalam prang utoh han soe

Oh lheueh syahid Saidina Husin
Susah han ban guda ragoe
Deungon jikilik jiplueng sigra
Jiwoe guda u meuligoe

Ban neukalon le Fatimah
Guda indah ka troh jiwoe
Zuljarami antok ulee
Yoh nyan padee nyawong sampoe

Guda indah mate yoh nyan
Bukon sayang guda ragoe

Sare Banun ngieng guda mate
Geubae le dum sinaroe

Kupahan bah badan lon seudang
Han ek lom geucang kafe pindoe
Asoe rumoh Rasulullah
Brubah limpah bandum geumoe

Di jonjongan lon paban bah
Habehe langkah lam donya nyoe
Neukheun neuba lon u Kufah
Mangah leupah bak bahaya nyoe

Hingga ka troh keunoe u blang
Teuka sagang kafe pindoe
Rakyat han le tuanku jipoh
Mayet gadoh han soe puwoe

Oh lon ingat sang ka reuloh
Hai teungku jroh tanglong nanggroe
Tuanku jipoj di teungoh blang
Hana rakan sidroe jatoe

Saidina Husin bukon sayang
Mayet di blang han soe puwoe
Deungon kudrat nibak Tuhan
Ulon paban payong nanggroe

Oh lon ingat haba pansan
Sang beukaram laju jinoe
Oh lheueh neupeugah peungajaran
Peuringatan dum keu kamoe

Oh noe habehe haba seudeh
Meung le rinteh takot paloe
Meung le cakri le nyang karot
Lon teumakot siksa dudoe

Nyoe hikayat cuco nabi
Han jeuet barangkari taboh rampoe
Lon kheun mantong nyang meukeusud
Ban nyang na buet lon hareutoe

Jinoe lon peugah Sam Daif
Jih that ganah hana bagoe
Asoe rumoh Rasulullah
Jibeureukah gaki jaroe

Kira-kira lapan reutoh
Rata jiboh bandum taloe
Laju jiba ubak Yazid
Raja laknat han thee keudroe

Raja Yazid jikheun leugat
U dalam glap jiyue pasoe
Zainal Abidin beutangisan
Seureuta neukheun haba meunoe

Aneuk cut-cut han jisayang
Lam tutpan jiyue pasoe
Bukon sayang ayah badan
Tinggai ulon droe nyan neuwoe

Ku paban bah badan kuseudang
Han ek kucang raja pindoe
Meung na umu neubri le Tuhan
Kupoh raja nyan kuboh taloe

Kareuna ulon mantong cut that
Bri hadarat goh lom sampoe
Adat badan lon ka raya
Raja cilaka jinoe kueumpoe

Meunan neukheun Zainal Abidin
Aneuk Husin nyang samlakoe
Yazid deungo neukheun meunan
Jiyue yoh nyan rante jaroe

Juyue boh rante jaroe gaki
Raja asi laknat pindoe
Ban lapan reutoh lon jiikat
Didalam glap seupot tuloe

Tapaban bah kheundak Allah
Aneuk mirah jiboh taloe

Syari Banun neukheun pantah
Bak kafulah dum disinoe

Nyang hakikat nibak Tuhan
Kon bak insan dum hamba nyoe
Cit ka meunan niabak asai
Yoh bak ajai dilee masa roe

Nyang bri saket deungon mangat
Buet hadarat laen han soe
Kuasa Po Ilahul hak
Ban yang kheundak Tuhan sidroe

Takeumeuang tham beurani tan
Geutanyoe dum ureueng binoe
Tan meularat tan manfaat
Bak hakikat dum geutanyoe

Siploh uroe buleuen Muharam
Keusudahan Husin jimaloe
Soe na yakin takhenduri
Tuhanku neubri pahla dudoe

Miseue khanduri Salatin
Keusudahan jikoh jaroe
Jaroe jime jijak tanom
Kheundak Tuhan poteu sidroe

Jikhanduri dum masa nyan
Ngon peurasan meubagoe-bagoe
Meunan adat barangkajan
Buleuen Muharam siploh uroe

Nyankeu sabab ureueng dagang
Mupeurasan teoh bak gantoe
Pat nyang jiduek jeuep-jeuep peukan
Meung kon meunan meuhat deuek troe

Nyankeu taeu ureueng dagang
Meupeurasan jeuep-jeuep nanggroe
Buleuan Muharam meupeurasan
Jipeh tayeuen macam bunoe

Jicat muka macam-macam
Soe nyang kalon hireuen laloe
Dagang paleh biek cilaka
Nyankeu bangsa nyang brok tuloe

Jiseumangat dinap mata
Carong raya aneuk bisoe
Meunyoe dagang bej peucaya
Bek rab gata barangkasoe

Habeh lon ngieng jeuep-jeuep banda
Nyang na raya cit meung gigoe
Adat takalon bak maniaga
Utoh raya bak jiseuboe

Keunoe neujak teungku ayah
Bak lon murah barang tabloe
Palikat na nyang haloh that
Ija get that murah han soe

Meunankeu dum jiboh padan
Ngon blah dagang bek meuturi droe
Oh noe tareh teungku meutuah
Bak phon kisah jinoe muwoe

Haba dilee meuriwang lom
Mangat meuphom dum geutanyoe
Muwoe kisah Fatimah Zainab
Didalam glap dum sinaroe

Lapan reutoh droe bandum mauhat
Dalam ikat kafe pindoe
Tuan Fatimah teuma teuringat
Keu Muhammad Nafiah sidroe

Neupeugah le ubak kaum
Tadeungo lon dum sinaroe
Jinoe tapeuget saboh surat
Haba mangat tahareutoe

Haba lam surat han peue'peugah
Tadeungo beu sah akhe dudoe

Teuma neuhei raja angen
Yue seumeuen le surat nyoe

Fatimah meuheu raja angen
Ka neukirem surat jinoo
Wahe angen keunoe ka tren
Surat ulon taba jinoo

Keu Muhammad Nafiah keudeh tame
Cit brat le dalam jeuem nyoe
Meunan narit bak Fatimah
Angen pantah ba surat nyoe

Ammabakdu hai meutuah
Muhammad Nafiah lon calitra
Muhammad Nafiah na taturi
Aneuk Ali nyang murtala

Nyankeu adek Hasan Husin
Bak meulen di Buniyara
Nanggroe jeuoh di baroh meugah
Meunan peuneugah lam calitra

Bak siuroe Muhammad Nafiah
Mutalaah kitab raya
Baro neu sion neulob kitab
Leumah surat angen bawa

Surat nyan sret dalam lymueng
Neucok neuleueng le neubuka
Muhammad Nafiah baca surat
Sret meudrab-drab ngon ie mata

Meunoe haba dalam surat
Deungo sahat lon calitra
Surat teuka bak Fatimah
Saleuem lon peugah nyan bandua

Seupeurti hai Hasan Husin
Yazid peulen gob nyan dua
Sajdina Husin mate syahid
Jipoh le Yazid di u Karbala

Kamoe laen dum jikat
Bandum jiglap uleh raja
Muhammad Nafiah beungehneu that
Nekrah rakyat ngon seedara

Troh le keunan ka meusapat
Jeuh ngon rab habeh teuka
Neukeurajeuen nanggroe Bagdad
Bandum rakyat ate suka

Tungan Turki Mungan Turki
Bandum nyanpi siseedara
Musib Tapa Tapa Musyib
Nyanpi sabit meuseedara

Neukeurajeuan deungo e tuan
That analan hana ngon sa
Uleebalang deungon rakyat
Neupeusapat dum barang na

Ka meusapat bandum kaum
Ka meuhimpun u Buniyara
Cukup leungkap deungo alat
Ka meusapat dum sineuna

Peukakah prang cukup leungkap
Cokma bulat peudeueng khanja
Hingga teuma neucok langkah
Muhammad Nafiah ngon lasyka

Ali Akbar pahlawan meugah
Dum kafilah balatandra
Nanggroe Madinah keunan beurangkat
Kareuna hajat jak tueng bila

Padum lawet geubeurangkat
Deungon rakyat han teukira
Hingga sampoe u Madinah
Geujak ziarah makam mulia

Geujak ziarah kubu nabi
Yakin ate tuha muda

Lheueh ziarah kubu nabi
Meuhimpon le dum sineuna

Ka meusapat sinan bandum
Geupeu maklum dilee nyang ka
Peugah riwayat Rasulullah
Ureueng Madinah nyang calitra

Keu Saidina Ali om geupeugah
Beurani leupah bak meungaza
Sampoe ubak Hasan Husin
Dan nyang laen syahid dumna

Calitra sampoe bak Fatimah
Dum kafilah ro ie mata
Muhammad Nafiah yakin ate
Seulaweuet keu nabi hana reuda

Muhammad Nafiah neumo sangat
Oh teuringat keu seedara
Teuringat keu Hasan Husin
Sret meuleng-leng ngon ie mata

Yoh nyan marit Muhammad Nafiah
Ka neupeugah bak seedara
Deungo kamoe wahe feelan
Keu junjongan seulaweuet taba

Kheun seulaweuet wahe tuan
Pagi peutang bek talupa
Hingga oh lheueh taseumbahyang
Beuet kuruan dumneu rata

Lheueh seumbahyang tahiyeuet meusjid
Dua rakaat lagee biasa
Tabaca khuteubah keu junjongan
Ali sajan nyang Murtala

Teuma keu Hasan deungon Husin
Sahbat laen dum seureuta
Habeh geumoe dumna rakyat
Ingat Muhammad nyang mulia

Lheueh seuleusoe baca khuteubah
Muhammad Nafiah buka haba
Tapeugah bak ureueng Madinah
Agama beuteugoh bandum gata

Peugot meusjid pat nyang reuloh
Mangat bek gadoh syae agama
Peugot titi pat nyang patah
Jeuep madrasah dum sineuna

Mangat ate ureueng Madinah
Neubri peurintah jalan nyang beuna
Bak simalam teukeudi Allah
Muhammad Nafiah leumah rasia

Neulumpoe meuteumeung ngon Rasulullah
Sajan ngon ayah Ali Mutala
Hai cuco lon Muhammad Nafiah
Nyoe lon peugah ubak gata

Dalam kubu na nyum leumah
Rasulullah lahe nyata
Hai cuco lon Muhammad Hanafiah
Nyoe lon peugah ubak gata

Tatueng bila Hasan Husin
Bek peue laen nyan takira
Lheueh nibak nyan karonnya Allah
Muhammad Nafiah laju jaga

Ban teukeujot neumoe limpah
Taeu bobah ngon ie mata
Teuma neupeugah ubak rakan
Dum ikhwan tuha muda

Hai seedara tadeungo lon
Tajak kunjong kubu mulia
Teuma geujak sikalian
Ubak makam nabi kita

Hingga sampoe keunan datang
Beuet kuruan bandum rata

Ladom seulaweuét ladom khatam
Macam-macam lakee doa

Karonya Po sidroe Tuhan
Keudeungaran saboh suara
Tadeungon lon Muhammad Nafiah
Nyoe lon peugah ubak gata

Tatueng bila Hasan Husin
Bek pueu laen nyan takira
Meunan suara keudeungaran
Azeueb han ban rakyat dum na

Habeh bae dumna rakyat
Sabab Muhammad meusuara
Lheueh nibak nyan duek mupakat
Meusyawarat dum sineuna

Hingga teuma putoh pakat
Uroe ahad prang phon mula
Keudeh teubiet bandum u blang
Bak mideuen prang u Karbala

Nyang ba alam geujak dilee
Saboh sukee nyang keupala
Atoran ceudah aki ali
Ngon beurani han sapat sa

Dilakot nyan ireng lhee droe
Aduen adoe siseedara
Umar Ali Talib Ali
Akai Ali nyan seedara

Sajan deungon meuntroe wazi
Ngon beurani lagi peukasa
Dilikot nyan Muhammad Nafiah
Ngon kafilah bala tandra

Uleebalang peuet blah ribee
Nyang meuteuntee dum keupala
Sikureueng ribee guda samaran
Dum alat prang leungkap dumna

Dum meuriam ngon peudatai
Biek beurani dum nyang jaga
Deungon utoh hana sakri
Jeuet jinari ateueh rueng guda

Ali Akbar that beurani
Oh geunari sang ceumpala
Yakin ate bak prang sabi
Dum sipai sama juga

Dum seunapang ateueh baho
Meuto-to jibeudoh cahya
Tujoh droe raja ireng sajan
That analan hana ngon sa

Nyang keu rakyat hana peue kheun
Sadom neleueng bak takira
Bandum geupubloe droe keu Tuhan
Nabi sajan geuniet seureuta

Yakin ate bak prang sabi
Uroe page balah syuruga
Bandum rakyat sangat garang
Geujak bak prang ate suka

Padum na treb geubeujalan
Troh mideuen prang u Karbala
Hingga teuma peudong kimah
Dum jeumaah maseng jeumba

Muhammad Nafiah neubri nasihat
Neupeuringat bak seedara
Tadeungo lon wahe teelah
Ubak Tuhan mohon pinta

Asoe rumoh Rasulullah
Beuek leupah nibak bahaya
Adat na Tuhan neubri idin
Zainal Abidin taboh keu raja

Alhamdulillah Rabil Alamin
Kabiu mu'min lakee doa

Muhammad Nafiah tanyong rijang
Soe na tuban tandra raja

Teuma seuot sidroe ureueng
Laju jikheun bak Maulana
Deelat tuanku lon eu baroe
Rakyat meukatoe sajan raja

Na peuet laksa guda kusaran
Laen nibak nyan gajah unta
Gajah Balohan nyang meuteuntee
Limong ribee ya Maulana

Laen nibak nyan wahe deelat
Jibri surat jeuep-jeuep raja
Yue tulong droe raja laknat
Kirem surat yoh nyan sigra

Ban neudeungo dum peuneugah
Subhanallah le neubaca
Lheueh nibak nyan na sikeujab
Sidroe beurangkat ureueng muda

Bak ureueng nyan neutanyong pantah
Pane langkah ho tahila
Ureueng muda seuot laju
Ulon tuanku nanggroe Cina

Kareuna ate rindu deundam
Suroh kadam ya Maulana
Teuma tanyong Muhammad Nafiah
Padum kafilah raja gata

Jiseuot le na lon pandang
Guda mantong nam blah laksa
Peuet blah ribee ureueng me jeurat
Bandum kuat ngon peukasa

Lalu teupike Muhammad Nafiah
Subhanallah le neubaca
Padum na trab teuma dudoe
Teuka lom sidroe ureueng muda

Muhammad Nafiah tanyong rijang
Pat bu makam nanggroe gata
Jiseuot le ya habibi
Nanggroe Peuranggi ulon teuka

Padum na le tandra Pauranggi
Tapeugah kri lon ngo nyata
Nyang na tuanku ulon lihat
Nyang rakyat lapan blah laksa

Guda Kusaran limong ribee
Gajah meubejee dua laksa
Nyan tuanku nyang meuteuntee
Dumnan sukee bandum tandra

Ban neudeungo meunan peuneugah
Neupujoe Allah nyang maha Esa
Dalam ate hana ugah
Beuthat kafilah meuploh laksa

Teuma teuka sidroe ureueng
Hitam galeu sang ngeue bangsa
Tatkalon babi sang lintah troe
Taeu gigoe meuaneuk sura

Muhammad Nafiah teuma teupike
Dalam ate hana lia
Teuma neukalon sidroe ureueng
Ka meuteumeung ngon Maulana

Muhammad Nafiah lom teumanyong
Pane gampong pat nanggroe gata
Jiseuot le ya habibi
Nanggroe peuranggi ulon teuka

Beukit meunan cuba peugah
Padum kafilah raja gata
Jipeugah le hai penghulee
Lapan ribee nyang meuguda

Teuma gajah siploh ribee
Nyang na lon thee hai Maulana

Nyang rakyat han peue lon peugah
Kon beurakah meulaksin laksa

Muhammad Nafiah ucap syuko
Neupujoe Po Tuhan nyang Esa
Neupujoe Po Rabbul kade
Hudep mate hukum Rabbana

Na sikeujab teuma dudoe
Troh lom sidroe ureueng muda
Ka neutanyong laju pantah
Pane langkah ho tahila

Jiseuot le rijang pantah
Nanggroe Habsyah ulon teuka
Beukit meunan rakan meutuah
Raja Habsyah dumna tandra

Nyang na tuanku ulon kalon
Guda mantong sikureueng laksa
Teuma gajah na nam reutoh
Nyang ek lon boh bak keunira

Meunan-meunan dum peuneugah
Muhammad Nadiyah hana lia
Meung sigeutu hana ugh
Droe nyan srah bak Rabbana

Neupujoe Po sidroe Allah
Nyang peurintah alam donya
Hudep mate hukum Allah
Droe nyan srah bak hak Taala

Muhammad Nafiah meusyuarat
Ngon kafilah dum seedara
Pakri jalan nyang muslihat
Prang meukarat bak lon kira

Meung tabri rab jijak keunoe
Meugriet geutanyoe hana tara
Bak lon ingat nyang leubeh get
Tapreh bak ret jalan raya

Meunyo leupah lam padang nyoe
Dum geutanyoe that seungsara
Habeheh jitet blang nyang luah
Naleueng habeheh guda seuba

Ie habeheh tho han peute tajebe
Bah le udeh prang tapuga
Musyip Tapa nyang phon seuot
Bak lon that patot ya Maulana

Idin tuanku keu lon neubri
Raja Peuranggi lon jak ngaza
Musoh Tuhan musoh nabi
Raja Peuranggi lawan hamba

Beukit han ek ulon lawan
Han lon iwang le bak gata
Lheueh nibak nyan teuma lagi
Umar Ali peugah haba

Idin tuanku syahi alam
Ulon lawan raja Cina
Deungon tulong sidroe Tuhan
Beuek lon hantam Cina cilaka

Meuhan talo kafe laknat
Nanggroe Bagdad hareuem lon gisa
Bah le apak abadum meusjid
Meungka syahid kamoe dumna

Lheueh nibak nyan teuma dudoe
Beuot jaroe Ibrahim nama
Idin tuanku lon meulangkah
Raja Habsyah lon jak sangga

Tungan Turki Mungan Turki
Com digaki ya Maulana
Idin tuanku keu lon neubri
Raja deungki lon jak ngaza

Mangat bek troh jajak keunoe
Lon preh jinoo diret raya
Lon mohon tulong nibak Tuhan
Beuek lon prang sicilaka

Beukit han ek kamoe lawan
Han lon pandang manusia
Teuma marit Muhammad Nafiah
Insya Allah bijeh mata

Tuhanku neubri berseulamat
Ngon syagaat nabi mulia
Beureukat nabi Saidil mursalin
Neutulong mukmin nyang sibeuna

Asoe rumoh Rasulullah
Beuek leupah dalam singkla
Adat na tulong nibak Allah
Beuek bicah kafe cilaka

Meung ka talo kafe lain
Zainal Abidin taboh keu raja
Beukit han ek kamoe lawan
Hareuem lon riwang u Buniyara

Muhammad Nafiah meunan kalam
Lheueh nibak nyan meukeukira
Padum na treb teuma dudoe
Raja peuet droe beudoh bungka

maseng-maseng cukop alat
Deungon rakyat balatandra
Com di gaki Muhammad Nafiah
Geucok langkah laju bungka

Maseng-maseng bak lawan droe
Geupreh jinoo bak ret raya
Teuduek haba nyoe dilee siat
Leubeh hibat nibak nyang ka

Deungo jinoo ulon kisah
Muhammad Nafiah lon calitra

Bak kafilah neupeurintah
Alam mirah phon neuyue ba

Lom neuyue peh ngon geundrang prang
Tuan Hasan tuntutan bila
Barisan meusap-sap jroh meureuntang
Ngon seunapang bandum rata

Ladom cokma nibak jaroe
Ladom cakmoe na ube pha
Geudeungoran ubak Yazid
Yoh nyan bit-bit susah raya

Muhammad Nafiah ka troh keunoe
Bak geutanyoe prang jingaza
Jak tueng bila Hasan Husin
Kon peue laen bak lon kira

Teuma Yazid yue peh geundrang
Teubiet u blang dum na tandra
Ho ka gata uleebalang
Panglima prang nyang raya-raya

Muhammad Nafiah tajak sagang
Talawan bek dukacita
Meuh ngon pirak bandum kubri
Dan lagi bajee ngon ija

Ka jibeudoh dum sipai
Jimeunari dinab raja
Laju jijak jroh meuriti
Jibeuot gaki samarata

Jipeh geundrang yub seurune
Meui-i ngon sangkakala
Nyang pahlawan jimeunari
That beurani hana ngon sa

Rakyat Yazid jiek laju
Ate seuu hana tara
Muhammad Nafiah ke neumeusu
Neuyue maju dum na tandra

Taek laju wahe takan
Tameucang bek dukacita
Bek teumakot nyan keu mate
Uroe page lam syuruga

Bandum kafe sitree Tuhan
Bek syok waham bandum gata
Yoh nyan maju ureueng Iseulam
Geungo seuruan bak Maulana

Sideh jiek sinoepi ek
Surak deumpek that meutaga
Sideh carong sinoe tarek
Jideumpek sang reuloh donya

Meuteumeung le dua pihak
Jimeutob tak han ban publa
Sideh leumbeng sinoe kapak
Ladom hayak peudeueng raya

Soe nyang deunong dum teukapak
Ka sampoe hak ajal teuka
Han ek pike mate rusak
Darah ulak ban keusumba

Nyang pahlawan jimat cakcoe
Jieungkhoe soe-soe meusua
Beukah muka reuloh gigoe
Le that sampoe hilang nyawa

Ureueng Iseulam gagah beurani
Tandra kafe meunyum lia.
Le that rakyat nyang ka mate
Tandra kafe dum meukeuba

Rakyat Yazid le that mate
Teutiek bangke han teukira
Beudaoh sidroe uleebalang
Jih pahlawan dalam tandra

Belakin nan teuseubot
Ureueng patot nibak raja

Aneuk cuco jih limong ploh
Bandum tanggoh pahlawan teuga

Dalam nanggroe jih geutakot
Beurani tht ngon peukasa
Jidong di keue raja Yazid
Jimarit jipeugah haba

Deelat ampon bek neugundah
Muhammad Nafiah keunoe lon ba
Neueu kudrob kubeureukahi
Kupeuseumbah ubak meukuta

Bah le bak gab jikheun meugah
Bak lon mudah kuboh singkala
Jaweueb Yazid kruseumangat
Mulia that narit gata

Ulon bri peue-peue nyang hajat
Timu barat takuasa
Meung ek tadrob Muhammad Nafiah
Nanggroe luah hukum gata

Hingga teuma uroe malam
Teuduek ngon rakan dum meulaksa
Maseng-maseng woe bak makam
Uroe siang trang cuaca

Uroe beungoh meusu geundrang
Belakin meujuara
Deelat ampon bek neugundah
Muhammad Nafiah ek kutampa

Aneuk Ali neueu kudrob
Kuseuob bek jan jigisa
Meunan jikheun laknat Allah
Poh beurakah ube raya

Jiingat droe nyang that meugah
Laen leumah bak jikira
Raja Yazid yoh nyan seut
Leumah leumbut ngon suara

Meunyo ek na ban tapeugah
Kamoe hilah peue nyang hawa
Meuh ngon pirak ban peuet peutoe
Ban peuet sagoe ban lhee gata

Beulakin ate mangat
Troh ban hajat bak jikira
Teuma jiheu nyan Sapiian
Aneuk aduen jih ban tiga

Nyanpi meugah that pahlawan
Didalam prang cit geuthee na
Bak Sapiiah leugat jikheun
Jak u mideuen jinoo sagra

Jikalee nyo Muhammad Nafiah
Tajak rampah keunoe taba
Jaweueb Sapiian pahlawan meugah
Muhammad Nafiah kudrob saja

Lon pahlawan that analan
Peuet reutoh man brat ceumara
Meunan narit si Sapiian
Jipoh rantam that meubura

Kafe paleh hana kayu
Kon sigeutu meujuara
Badan raya miseue baku
Sigunca bu sigo seuba

Jiteubiet le si Sapiian
Guda hitam jipoh lawa
Troh Sapain jak u mideuen
Jieu ureueng sangat that bha
Beungeh jithat kafe bejeueng
Ulee peudeueng ka jigisa
Sapiian tak le ngon peudeueng
Syahid ureueng dum meukeuba

Na peuet ploh droe syahid ureueng
Kafe bajeueng that angkara

Peuet ploh ureueng ka jibunoh
Kafe biyoh that guranta

Muhammad Nafiah teudong jeuoh
Neungieng musoh beungeh raya
Rakyat jicang hana teudoh
Leubeh peuet ploh nyang ka pana

Muhammad Nafiah peurab rijang
Mupandang ngon sicilaka
Ban jikalon le Sopian
Baro datang ureueng muda

Peurab Sapain le keunan toe
Jitanyong soe nama gata
Beukit gata ureueng lakoe
Cuba theun nyoe nak tarasa

Sopian tak le ngon peudeueng
Kafe bajeueng that guranta
Muhammad Nafiah tapih peudeueng
Ka teugageueng reubah teuhanta

Peudeueng nuecok jihpi neutren
Rimueng teugom hilang nyawa
Nafiah trom deungon tapak
Teubiet utak mate pana

Oh lheueh mate nyan Sopian
Teuka laen hana reuda
Beulakin ngieng mate kumuen
Jiyue aduen jih nyang tiga

Hai Salafi kajak bagah
Muhammad Nafiah keunoe ka ba
Ngon soe laen jih nyang meugah
Oh ka troh kah gadoh teuga

Salafin teubiet pantah
Beungeh leupah hu ngon mata
Jimat cokma peuet reutoh man
Jitatang ban bak u dara

Jitajo le laju bagah
Muhammad Nafiah kalon rupa
Ban neukalon beungeh leupah
Neugrob pantah le neuhila

Meung cokma han jan jibeuot
Ka neureubot pantah sigra
Neukiloe le ngon ceumeuti
Ka meugule sinan pana

Mate sinan le teupipoe
Ka dua droe tinggai donya
Beulakin gieng aneuk mate
Saket ate hana tara

Pangge bandum aneuk cuco
Ka meusaho ban seumua
Beulakin sangat amarah
Beungeh leupah hu ngon mata

Jinoe kajak kah beuhabe
Kadrob sijeh Nafiah nama
Peue jipeugah bek kapateh
Peurlu jih keunoe kaba

Jibeudoh le dum sinaroe
Aduen adoe keumuen apa
Bandum beungeh kab-kab gigoe
Ladom bagoe silak ija

Ban troh keunan kafe bajeueng
Beungeh ban hueng kurek bara
Laju jiseuot le ngon peudeueng
Kafe bajeueng jitak lanja

Muhammad Nafiah han sapeue neukheun
Neudong mantong hana haba
Dumna kafe beungeh jih that
Ka jirapat ban seulingka

Oh ban sare ka meusapat
Neudrob leugat seun-seun dua

Bak bumoe laju neusumpom
Ladom neutrom hilang nyawa
Ladom mate guda gidong
Gaduh carong dum panglima
Nyang troh keunan bandum mate
Tan sidroe le meuteumeung gisa

Habeh bandum ban siguree
Neueumpee han jan jihee ma
Bangke teutiek dum teudu-du
Beukit taeu ate lia

Beulakin ate gundah
Bandum sudah ate pana
Jingieng blah wie deungon uneun
Han le keumuen jih nyang maba

Ateueh guda le jipasang
Laju u blang jipoh lawa
Cokma beusoe jime sajan
Jitatang ngon peudeueng raya

Beungeh jih that hana lawan
Na miseue ban gajah manta
Ban sare troh jih u mideuen
Ka meuteumeung ngon Maulana

Beulakin tanyong pantah
Soe nama kah peugah haba
Kah cit mate bak uroe nyoe
Nak kutusoe tinggai nama

Muhammad Nafiah jawueb meunoe
Deungo jinoe hai cilaka
Nyoekeu cucu Rasulullah
Muhammad Nafiah geuboh nama

Nyoekeu aneuk Saidina Ali
Nyang lahe di Buniyara
Ku meujak poh raja Yazid
Kayue teubiet laju sigra

Ban jideungo neukheun meunan
Beulakin khen teutawa
Kadeungo hai Muhammad Nafiah
Uroe nyoe kah habeh donya

Seedara kee habah kapoh
Tan le meusaboh kueur rupa
Aneuk cuco ku limong ploh
Dum kasampoh kapupana

Bak uroe nyoe bila kutueng
Ho lom kaplueng hai cilaka
Bak sat nyoe kupoh mate
Bek hudep la dalam donya

Oh lheueh kupoh kah nyan mate
Kuhue bangke ubak raja
Teuma seut Muhammad Nafiah
Insyallah hom kacuba

Sang han sampoe ban napsu kah
Laknat Allah kah cilaka
Beulakin jigrak peudeueng
Jitak rincong bak keupala

Neugrob pantah blah ret uneun
Leupah peudeueng han binasa
Jikilah lom ngon amarah
Neusangga pantah peurise raya

Keunong peurise patah peudeueng
Kafe bajeueng beungeh raya
Beulakin beungeh ban hueng
Patah peudeueng jicok cokma

Cokma beusoe jigrak rijang
Jihantam ateuh Maulana
Oh ban sare neuu meulayang
Neudrob rijang le neuhila

Meuhila-hila keudeh keunoe
Meusoe geumoe hana tara

Neutarek le deungon kuat
Han ek jimat kreueh neuhila

Lheueh u jaroe Muhammad Nafiah
Neupoh pantah bak keupala
Reubah laju ka meusumpom
Jibeudoh lom miseue nyang ka

Jiseuet le kreh dalam sarong
Jikeupong ateueh Maulana
Ban jimeutob ka neusambot
Yoh nyan teumakot pi cilaka

Laju neuwiet han neukeubah
Laju patah ka jeuet dua
Teuma neutrom nibak keuieng
Ka teugageueng reubah teuhanta

Keureupah keureupoh jimeung beudoh
Teuma neupoh lom bak muka
Beukah ulee teubiet utak
Ka sampoe hak hilang nyawa

Sinan ma te ka teukeupak
Teubiet utak mate pana
Beulikin umu sampoe
Kafe pndoe asoe neuraka

Habeh mate dum sinaroe
Hana le soe nyang keupala
Yazid kalom Muhammad Nafiah
Yoh nyan gundah hana tara

Yazid tanyong ubak Marwan
Pakri prang ka tiwah raya
Habeh mate dum pahlawan
Pakri jalan ngon bicara

Dum na rakyat habeh jilet
Huteuen sirahet jipeudada
Bak lon pandang that meusaket
Ho maken treb susah lanja

Han jeuet taiem wahe guree
Pakri lagee toh bicara
Kheun Marwan nyang meuteuntee
Piyoh dilee po meukuta

Teuma Marwan yue peh geundrang
Rakyat di blang dum meugisa
Maseng-maseng woe u teumpat
Teuduek siat sikutika

Singoh beungoh uroe siang
Syahi alam jatoh sabda
Pa kon meunan uleebalang
Didalam prang cit geuthee na

Hai penglima wazi meuntroe
Geusiyik sagoe ngon peutua
Soe tem muprang bak uroe nyoe
Ngieng keu kamoe siblah mata

Kubri hadiah meuh ngon intan
Nyang sukaan nibak gatra
Seuot sidroe uleebalang
Didalam prang cit geuthee na

Sangat gagah bak jimuprang
Lagi tungang silageena
Khalik deungki geuseubut nan
Raya badan hana ngon sa

Tangieng rupa that meulaku
Deungon su sang tambo raya
Taeu durueng sang peunyaket
Deungon kulet hitam sukla

Deungon mata tan sunabe
Cit saket le soe eu rupa
Oh takalon ate kuyu
Mata jih hu miseue sua

Deungon badan han jeuet taeu
Sugunca bu sigo seuba

Jibeudoh le Khalik Deungki
Jimeunari dinab raja

Deelat ampon bek neugundah
Muhammad Nafiah keunoe kaba
Neue kudrob kubeureukah
Kuba pantah bak meukuta

Deelat tuanku bek le susah
Muhammad Nafiah neupreh lon ba
meunan narit Khalik Deungki
Raja 'asi ate suka

Raja salen Khalik Deungki
Peukayan jibri dum peurmata
Cukup deumpeue peusalenan
Jeuneh intan ngon peurmata

Jigiduek le ngon guda plang
Jihei lawan hana reuda
Ka jiteubiet laju u blang
Jitatang ngon peudeueng raya

Peurab keunoe Muhammad Nafiah
Gata meugah that kuasa
Bak uroe nyoe gadoh meugah
Kureupah kuba bak raja

Meunyo gata ureueng lakoe
Taubiet keunoe kueurupa
Peue buet sajan ureueng binoe
Teubiet keunoe laju sigra

Saket ate Muhammad Nafiah
Neuek pantah ateueh guda
Oh troh keunan u hadapan
Jikheun rijang meunoe haba

Tadeungo lon Muhammad Nafiah
Sayang leupah lon keu gata
Meunyo tatem talakee meuah
Nyang ka salah nibak raja

Han le kupoh gata jinoe
Dua geutanyoe meuseedara
Meuhan tatem kupoh jinoe
Dalam jeuem nyoe kepeupana

Muhammad Nafiah jawueub rijang
Peue takian lon le gata
Lhok deungon dheue ka kutuban
Phet ngon masam ka lon rasa

Meunyo ka tem ka Iseulam
Meuhan kucang kah cilaka
Lam siat nyoe takue kureupang
Tulong Tuhan kah binasa

Khalik Deungki deungo meunan
Beungeh yoh nyan hu ngon mata
Jisuet peudeueng le ngon pantah
Muhammad Nafiah jicang lanja

Khalik Deungki tak ngon kuat
Pru neulumpat leupah mara
Seureuta neukheun bek beungeh that
Han troh hajat kah cilaka

Khalik Deungki beungeh tuloe
Lom jikiloe han ban publa
Jitak keudeh neugrob keunoe
Napi sidroe neutheun sangga

Teubiet reuoh apoh apah
Sangat payah sicilaka
Kafe paleh sangat payah
Jipeugagah jicang lanja

Neutheun mantong Muhammad Nafiah
Cit neukilah mantong saja
Khalik Deungki teuma peugah
Cuba balah nibak gata
Cuba jinoe laju balah
Buet jaroe kah kumeung rasa

Teuma seuot Muhammad Nafiah
Kukalon kah payah raya

Piyoh dilee bah puleh payah
Bek yue balah le ngon sigra
Meung ka kucang han peue peugah
Ka meuhat kah laju pana

Jijaweueb le teuma pantah
Ngon amarah hu ngon mata
Peue kakira keu kee payah
Cuba balah kumeung rasa

Meunyo meunan theun ulee kah
Nyoe kubalah hai cilaka
Neugrak peudeueng Muhammad Nafiah
Neugrob pantah neucang lanja

Yoh nyan neutak deungon kuat
Beungeh neuthat hana tara
Khalik Deungki theun peurise
Neutak meuphee berukah dua

Beukah peurise putoh badan
Jeuet dua khan mate pana
Oh ban mate kafe pindoe
Troh le adoe jak tueng bila

Nan geuseubut Datok Deungki
Cit geuturi nibak nyang ka
Deungon badan bungkuk udang
Kulet hitam sang ngeue bangka

Takue bulat na ube krong
Boh punggong na ube bahtra
Badan tumbon get that sulu
Ok taeu sang jab lam paya

Beuhe tungang kafe ase
Han jimalee raja-raja
U mideuen prang laju jikacee
Nyang meuteuntee jak tueng bila

Oh sare troh keunan u blang
Jitanyong ban siseun lingka
Muhammad Nafiah jawueub rijang
Kon ulon cang aduen gata

Lon trom bacut deungon gaki
Ka teukeudi mate pana
Beungeh raya Datok Deungki
Jikab bibi jigrak cokma

Muhammad Nafiah jipoh laju
Jihindru ngon cokma raya
Muhammad Nafiah grob sigeutu
Cokma lalu leupah saja

Ka jipoh lom meuadoe-adoe
Hana sunyoe sikleb mata
Muhammad Nafiah sangat rago
Bak peuleheuh droe ka biasa

Datok Deungki poh ngon kuat
Reuoh teubiet lam-lam mata
Muhammad Nafiah sang han neupoh
Kafe biyoh beungeh raya

Silab mata hana jingieng
Neudrob di keuieng ka neuputa
Nibak bumoe leju neuseumpom
Rimueng teugom meukilah pha

Jimeung beudoh cula caloe
Cokma bak jaroe laju neuhila
Neuseukok le bak ulee droe
Kafe pindoe mate pana

Mate sinan le teupipoe
Meuadoe-adoe laen teuka
Nyang troh keunan bandum neupoh
Hana saboh le meugisa

Nyang pahlawan dua reutoh
That meureugoh lagi raya

Dumna mate pahlawan kuat
Nyang rakyat han ek takira

Raja Yazid beungeh jih that
Han le rakyat habeh pana
Yazid yue peh le geundrang prang
Rakyat riwang dalam kuta

Lagi uroepi ka malam
Seungab diam sikutika
Raja Yazid peuduek pakat
Meusuarat meuntroe ngon raja

Uleebalang dum meusapat
Jijitihad buatan raja
Pakri laku hai Marwan
Prang tiwasan tiep-tiep kali

Han tom siat nyang na mantong
Cit barangjan dalam undi
Sabab sidroe Muhammad Nafiah
Prang lam tiwah saban hari

Dum pahlawan gadoh meugah
Bukon ceudah aneuk Ali
Dumna pahlawan nyang ka jipoh
Tan meusaboh nyang keumbali

Nyang keu rakyat han tatuoh
Aneuk peurumoh dum ka'a ka'i
Jinoe pakri sijahtira
Nibak gata guree kami

Nibak ulon tah bicara
Dalam dada seungkoek seukali
Marwan Hakim jawueb sigra
Na bicara wahe duli

Miseue gajah badan raya
Tamita akai nyang deungki
Han jeuet tuanku peusak teuga
Ngon bicara jih tatakai

Meunyo tuanku peusak gagah
Geutanyoe bicah wahe duli
Barangpeue buet deungon ilah
Deungon mudah ek tataki

Jinoe tahimpun bandum rakyat
Tapeusapat kanan kiri
Dum beurata tayue me jeurat
Deungon alat tayue nanti

Singoh beungoh tayue muprang
Bek le di blang bah le sinoe
Oh troh teuka Muhammad Nafiah
Dum kafilah tayue lari

Bah le jiek dum beuleupah
Jeurat beusudah dalam jaroe
Oh ka leupah jiek lansong
Tayue keupong kanan kiri

Dumna jeurat tayue jilambong
Ho lom jikong aneuk Ali
Raja Yazid jawueub leugat
Bit beuna that ban tarawi

Jihimpon le dumna rakyat
Ate mangat raja'asi
Bak jisangka troh ban hajat
Jikeumeung jeurat aneuk Ali

Singoh beungoh uroe siang
Meusu geundrang bandua si
Muhammad Nafiah, teubiet u blang
Ngon angkatan kanan kiri

Neueu kafe dum meureuntang
Keunong rakam bak jiantri
Muhammad Nafiah cit neuthee
Jiboh lagee keumeung taki

Teuma rakyat neubagi lhee
Maseng sukee neuyue antri

Saboh bagoe Ali Akbar
Nyang that teuga cit geuturi

Muhammad Nafiah neukheun meunoe
Deungo kamoe wahe Ali
Tinggai sinoe dilee gata
Lon eu muka dua bagi

Bah lon tamong nyan u dalam
Di beulakang gata Ali
Aoh ka meucuet ulee kawan
Tahantam bek le beureunti

Insya Allah tulqng Tuhan
Talawan kafe hareubi
Ali Akbar jawueub pantah
Insya Allah hai ya Saidi

Muhammad Nafiah neubri jalan
Ngon angkatan kanan kiri
Neulob laju dalam kawan
Hana seugan dalam ate
Kafe kalon ate mangat
Jitob leugat nyan dua si
Oh ban meucuet ulee kawan
Jeurat jilambong kanan kiri

Neukalon jeurat jroh jilambong
Neucang rincong hana sakri
Muhammad Nafiah neugrob lambong
Neutak rincong sret u bumoe

Ka jitiek jeurat jicok beude
Jipeulheueh le dum meuriti
Ali Akbar sangat utoh
Beude neucoh hana khali

Peulheueh beude sinoe sideh
Sang beureuteh pade mari
Soe nyang keunong sinan teueh
Meupaehpi bandua si

Ali Akbar that gurangsang
Kafe neucang hana nanti
Wie ngon uneun han neupandang
Kafe neucang yakin ate

Muhammad Nafiah dalam kawan
Deungon rakan dua bagi
Kafe hudom dum jirapat
Ka jikarat kanan kiri

Muhammad Nafiah ka neulumpat
Neupah leugat kafe'asi
Neucang kafe dum meulipat
Tajampi that hana sakri

Nyang rakyatpi hana teudoh
Prang that sunggoh bandua si
Sideh sinoe beude jicob
Prang meukeucoh hana khali

Rakyat mate hana teudoh
Meureutoh ploh sampoe janji
Nyang mat leumbeng jimeutob-tob
Jimeudrob-drob sabe berani

Nyang pahlawan jimeureupah
Hana tiwah bandua si
Soe nyang mate sinan reubah
Kakeu sudah sampoe janji

Nyang mat cokma jimeupoh-poh
Sang-sang reuloh donya meusundi
Rusak mate han peue peugah
Dum kafilah bak prang ini

Masa nyan prang that kalang kabot
Uroe seupot han taturi
Keudeh keunoe han meusurot
Sang leuek meulot deungon muri

Sideh sinoe hana teudoh
Boh beureutoh Ka'a ka'i

Naleueng putoh tango sieb sueb
Buet busu bleuet ali-ali
Bak masa nyan Muhammad Nafiah
Beungeh leupah hana sakri
Neumat cokma bandua blah
Neupoh pantah kafe hareubi

Oh neudeumpek that meutaga
Sang-sang geumpa leungo bumi
Kafe neupoh hana reuda
Meukeuba-keuba kanan kiri

Nyang mate han ek takira
Allah Taala nyang keutahui
Muhammad Nafiah that guranta
Deungon cokma neupeunari

Ho nyang neupoh leunan seungab
Ho neupeunab keunan sunyi
Kafe mate dum meutabu
Oh taeu that kuyu ate

Taeu bangke dum teudu-du
Neuhumpu hana beureunti
Darah ile ban ie raya
Gajah guda habeh reule

Meunan peuneugah lam calitra
Kon kupeuna le ureueng rawi
Muhammad Nafiah hana teudoh
Kafe biyoh dum neutadi

Suara cokma that bit riyoh
Boh beuratohpi tan lanti
Raja Yazid ate kayu
Jieu laku prang that undi

Rakyat mate dum teudu-du
Meutabu sang timon pasi
Kafe paleh susah jih that
Han le rakyat habeh mate

Jiyue peh geundarang teuma leugat
Riwang rakyat dum keumbali
Seungab beude tadeungo surak
Dua pihak ka beureunti

Yue boh ubat nyang ka rusak
Ban patot hak raja yue bri
Maseng-maseng woe bak teupat
Teuduek siat haba ini

Raja peuet droe lon calitra
Nyang ka bungka dilee hari
Prang mueumpok di rot raya
Bek troh teuka kafe 'asi

Maseng-maseng kaseb jeumpa
Musip Kafa nanggroe Peuranggi
Bak rot raya prang meurumpok
Sinan meupok bandua si

Raja Yazid han jeuet jitulong
Jeuep-jeuep gampong prang ka jadi
Ka jimuprang meuseueng abeueng
Na nyang puntong jaroe gaki

Musip Kafe neugrob lambong
Neutak rincong reuloh gusi
Dua deungon kafe Musip
Geumuprang bit kafe undi

Umar ngon Ali nanggroe Cina
Prang agama nanggroe sunyi
Cina kheng khong dum neuhantam
Buet pahlawan Umar Ali

Deungon rakyat bandum sunggoh
Geuprang musoh kafe 'asi
Ngon jisurak kapah kapoh
Kaah kaoh hana sakri

Ibrahim Asat deungon Harif
Nanggore Habsyah ka neutadi

Disinan prang raya leupah
Ban dua balah hana undi

Keudeh mate keunoe reubah
Hana tiwah bandua si
Tungan Turki deungon Mugan
Ka neuhantam nanggroe Deungki

Maseng-maseng ka na lawan
Dum geumuprang tan beureunti
Raja Yazid han jeuet jitulong
Ka jikeupong diret ini

Teuduek siat haba prang nyan
Keu junjongan lon peugah kri
Raja meuntroe uleebalang
Dum sibirang geusyik waki

Bak uroe nyoe keusudahan
Tahantam kafe hareubi
Jimeupoh-poh dum pahlawan
Jimeucang sabe beurani

Keudeh mate keunoe rusak
Prang meuhayak nanggroe Deungki
Muhammad Nafiah tatkala nyan
Ubak rakan neupeugah kri

Bek sigeutu tabri lapang
Talet tacang musoh nabi
Beudoh rakan bandum sare
Nak bek treb le tabeureunti

Tajak mita raja Yazid
Taprang bit-bit bek le nanti
Muhammad Nafiah meunan narit
Kaum dum bit suka ate

Ureueng Iseulam ate seue
Beudoh laju dong meuriti
Lheueh nibak nyan geujak laju
Geundrang meusu ngon napiri

Raja Yazidpi ka keumah
Ngon kafilah meuntroe wazi
Jime kandran gajah puteh
Sangat meujeulih raja 'asi

Dalam ate jih that seudeh
Prang nyoe habeh ini hari
Jihe geusyik ngon panglima
Sigala na meuntroe wazi

Uroe nyoe tabalah guna
Nyang seutia deungon kami
Bak uroe kujak muprang
Talo meunangpi kuasi

Kuharap bak uleebalang
Ngon angkatan kanan kiri
Bah kulawan Muhammad Nafiah
Meung mukakah pat beurani

Geunap aroe sabe lam tiwah
Oh meusanggah pru kalari
Raja Yazid teubiet u blang
Ngon angkatan meuntroe wadi

Muhammad Nafiah cit ka di blang
neupreh lawan sitree nabi
Sira Yazid preh troh datang
Mentunang prang ini hari

Jitajo le uleebalang
Meutob meucang han tatukri
Nyang mate sinan teukeupak
Nyang rusak jikliek meui-i
Hana teudoh jimeutob tak
Darah ulak tan beureunti
Nyang pahlawan jimeureupah
Sabon gagah ngon beurani

Soe nyang mate sinan reubah
Habeh langkah ngon raseuki

Nyang hudép sabe jimeucang
Didalam blang ka'a ka'i

Bak uroe nyan raya that prang
Jroh meulambong hana sakri
Raja Yazid diteungoh kawan
Uleebalang kanaq kiri

Hana teudoh jiarah prang
Wahe rakan bek talari
Tangieng keu lon wahe rakan
Tamuprang bek susah ate

Jiek santeuet hana macam
Jroh aturan raja 'asi
Muhammad Nafiah kalon rupa
Sang-sang raja ka neuturi

Ateueh gajah jroh analan
Neungieng raja nyan jibeureunti
Neukheun ubak Ali Akbar
Sinoe gata wahe Ali

Raja Yazid lon jak mita
Dalam tandra lon jak cari
Menyo meuteumeung di hadapan
Lon simpan hana beureunti

Lheueh neukheun nyan neujak lanja
Neujak mita raja 'asi
Ali Akbar blah ret baroh
Kafe biyoh dum neutadi

Nyang di rakyatpi tan teudoh
Tango riyoh hana sakri
Uroe nyan prang that meuhubo
Nyum sang hanco bumoe ini

Muhammad Nafiah neujak leugat
Raja laknat neujak cari
Wie ngon uneun neupoh rakyat
Mate le that han tatukri

Wie ngon uneun neupoh rakyat
Mate le that kafe 'asi
Raja Yazid ateueh gajah
Sam Daif siblah kiri

Jieu ka rab Muhammad Nafiah
Ate uga raja 'asi
Nyum teumakot laknat Allah
Bit that gagah aneuk Ali

Meuhan mate siceulaka
Prang han reuda tiep-tiep hari
Muhammad Nafiah meumat cokma
Dalam tandra neupeureugi

Neupoh rakyat han ek kira
Dum meukeuba sampoe janji
Sam Daif kafe laknat
Mat busu bleuet nibak jari

Sam Daif jigrob bacut
Peulheuh busu bleuet hana lanti
Teukeudi po Tuhan makbud
Keunong meuheut cuco nabi

Muhammad Nafiah keunong di baho
Ka teusungko ateueh bumi
Jaroe uneun teulheueb siblah
Muhammad Nafiah ka teukeudi

Meunan teukeudi nibak Tuhan
Putoh tangan po juhari
Raja Yazid tajo pantah
Jimeung tamah jak poh lagi

Teuma teuka suara di manyang
Bek that garang wahe 'asi
Wahe Yazid bek that cangklak
Beukah tangkurak euntreuk pakri

Han jideungo laju jijak
Beureutoh tangkurak Tuhan neubri

Tum beureutoh jih teukeupak
Meuhambo utak habeh raseuki

Raja Yazid kakeu mate
Hana soe le yue dong antri
Reubah sinan le teugageueng
Tuhan tulong cuco nabi

Jibrai tren le u bumoe
Peukab jaroe po juhari
Kudrat Tuhan bak set muwoe
Leubeh bak baroe Tuhan neubri

Muhammad Nafiah pujoe Allah
Ucap tasbeh pujoe Rabbi
Sam Daif that teukeujot
U likot leugat jilari

Muhammad Nafiah pujoe Tuhan
Keu junjongan seulaweuet lagi
Teuma neubeudoh laju sigra
Ateueh guda neupaseng le

Neupet mata neukab gigoe
Kafe pindoe lom neutadi
Kafe neupoh han tatuoh
Seupot beungoh han peuduli

Darah ile dum meukuboh
Hai teungku jroh han tatukri
Sam Daif le meuhadap
Jibeuot tungkat ateueh saidi

Jipoh deungon habeh kuat
Patah tungkat Tuhan neubri
Patah tungkat jicok peudeueng
Kafe bajeueng that beurani

Muhammad Nafiah peurise neutheun
Patah peudeueng lom Tuhan bri
Patah peudeueng ka jimat kreh
Kafe paleh kreueh that ate

Jitob laju Muhammad Nafiah
Neudrob pantah deungon kiri
Bak tanoh laju neusumpom
Hanco sum-sum jeuet keu kanji

Sam Daif sinan mate
Teutiek bangke han soe peuduli
Didalam blang ka teukekeueng
Kafe bajeueng sitree Rabbi

Marwan Hakim yoh nyan jiplueng
Kafe bajeueng ka jilari
Laju jiplueng peusiblah tuboh
Saleh ho roh han peuduli

Muhammad Nafiah beungeh han soe
Han le sidroe nyang beurani
Neupoh kafe dum sinaroe
Neusudoe kanan ngon kiri

Kafe jiplueng dum jiboh droe
Neueumpoe hana beureunti
Darah ile ban ie raya
Lam blang raya han ek kheun kri

Nanggroe talo raja mate
Meung bangke han soe peuduli
Nanggroe talo rumoh dum soh
Han tatuoh leupah sunyi

Pat-pat nyang na bandum neupoh
Tan le saboh nyang beurani
Muhammad Nafiah beungeh neuthat
Neuseumagab tan beureunti

Teuma sampoe bak rumoh glap
Neulheueb leugat neumeung tadi
Neungieng inong sinan sarat
Beungeh neuthat po juhari

Pinto geudong neulheueb leugat
Neuseumngat cokma beusi

Tuan Fatimah neukheun syahdat
Teudong, leugat po juhari

Adat kon rijang neukheun syahdat
Nyanpi ka rab neumeung tadi
Muhammad Nafiah ingat pulang
Neucom rijang tuot umi

Teuma neuseubut ngon teumuda
Sret ie mata tan beureunti
Tuan Fatimah neucom bak dhoe
Hai samlakoe jantung ate

Beuseulamat dua nanggroe
Hai samlakoe nyang juhari
Ngon ie mata laju ile
Bandum sare moe meu'i-i

Zainal Abidin neukalon le
Ka meurante jaroe gaki
Muhammad Nafiah neuploh taloe
Bak keumuen dröe nyang juhari

Neungieng keumeun Sayang raya
Rante ube pha jaroe gaki
Zainal Abidin sret ie maka
Neuseubot apa com di gake

Muhammad Nafiah sambot sigra
Ngon ie mata hana khali
Teuma marit Muhammad Nafiah
Neuamanah ubak umi

Ngon teumuda dua sajan
Jinoe riwang woe u nanggri
Bek le sinoe tinggai lama
Ban sineuna woe keumbali

Idin ulon tinggai dilee
Lon jak poh sitree musoh nabi
Han kukeubah jih meusaboh
Jeuet keu musoh teuma lagi

Kadang syahid lon habeh langkah
U Madinah han troh keumbali
Zainal Abidin neuboh keu raja
Hai teumuda deungon umi

Nyankeu nyang na wasiet hamba
Hai teumuda neupeuduli
Sira neukheun nyan ie mata limpah
Muhammad Nafiah seudeh sikali

Teuma seuot tuan Fatimah
Singkat langkah lon keumbali
Ulon gisa ate susah
Bungong kipah tinggai sini

Meunan narit tuan Fatimah
Peunoh limpah ie mata ile
Lon puwoe sigra u Madinah
Aneuk meutuah bek na sangsi

Bak le sigo tameulangkah
U Madinah takeumbali
Muhammad Nafiah peugah sigra
Bah le bunda dilee peureugi

Bek le tinggai sinoe lama
Ban sineuna woe keumbali
Dilon kuwoe di beulakang
Meung na Tuhan idin neubri

Meung na umu Tuhan keubah
Meung na langkah lon keumbali
Teuduek oh non dilee kisah
Ulon peugah po juhari

Muhammad Nafiah beungeh han ban
Sapeuepi tan neupeuduli
Dum na rakyat cok rampasan
Ban sukaan galak ate

Muhammad Nafiah saket ate
Neubeudoh le lom peureugi

Neujak poh lom kafe laknat
Neulet leugat lom neutadi

Ali Akbar hana piyoh
Kafe neuopoh le that mate
Neucang kafe meuseueng abeueng
Ladom puntong jaroe gaki

Ladom keunong bak boh punggong
Ladom untong teulheueb bibi
Ali Akbar that gurangsang
Kafe neucang tan beureunti

Muhammad Nafiah hana teudoh
Beude pajoh hana sungi
Nyang hana plueng bandum neupoh
Tan meusaboh nyang huddep le

Rakyat mate rumoh dum soh
Nanggroe teuboh kanan kiri
Tinggai saboh inong ulu
Nyanpi teungku neumeung tadi

Nyankeu judo tuanta Hasan
Laila Meusyen nan geurasi
Oh ban jieu Muhammad Nafiah
Jicok langkah le jilari

Jiplueng laju inong ulu
Meu'u'u sang rieuék pasi
Muhammad Nafiah neulet laju
Inong ulu neumeung tadi

Malaikat tren jak seumubla
Gunong raya ka teurjadi
Meusuaru teuma di mariyang
Neutham junjongan le Jibraill

Hai Muhammad Nafiah bek le tapoh
Tinggai saboh ashabun nari
Meung mate nyan teuma tapoh
Neuraka soh hana isi

Ban neudeungo suara di manyang
Sabab jonjongan panas ate
Oh ban neuueu gunong teudong
Neuproh yoh nyan neuueumpoe le

Gunong hanco ka teupeuro
Inong ulu jiteubiet le
Hai teumuda neupreh dilee
Na peue bak kee jinoe kubri

Maken jiplueng ngon meuree-ree
Lam guha batee ka jilob le
Muhammad Nafiah let di likot
Ho nyang dijob seutot sabe

Oh sare troh ubak guha
Nyang mulia ka neudong le
Pinto guha na dua boh
Saleh nyang toh han neuturi

Saleh ho roh inong bajeueng
Ho ka jiplueng inong 'asi
Mita keunoe mita keudeh
Inong paleh beuseumbunyi

Muhammad Nafiah teuma riwang
Inong jalang han meuho le
Oh ban beudoh neujak lanja
Pinto guha neutob lagi

Muhammad Nafiah ka ulua
Neueu rupa uleh saidi
Saboh bale neuueu teudong
Deungon kulam jroh han sakri

Naleueng komkoma timoh sinan
Eumpeuen guda nyan Tuhan neubri
Ie kulam nyan puteh hijo
Soe ngieng tahe ate beureuhi

Batee jih meuh pirak hupam
Pudoe intan ngon fiddati

Sangat indah hana macam
Soe nyang pandang ate suka

Muhammad Nafiah ka neupiyoh
Dang tho reuoh sikutika
Muhammad Nafiah teutap sinan
Han jeuet tuan le keulua

Ka neupeuteutap uleh Tuhan
Bek raguan hai seedara
Oh nae habeh hikayat nyoe
Bandum geutanyoe cok seumpeuna

Ohnoe tamat hikayat Hasan
Seureuta Husin keuduanya
Teuma tanbeh lon boh bacut
Ube nyang jeuet sipatah dua

Lon lakee meuah bak rakan sahat
Kadang silab meutuka banja
Na lon tamah ngon peukureueng
Mangat muphom oh tabaca

Nibak Jawi lon peu Arab
Sipat-pat sibareh dua
Salah titek deungon hurup
Tapeumeuah kon lon saja

Hurup reumbang le that kengkeueng
Hurup ruhueng le that buta
Beukit meunan bek peue neukheun
Sabab ulon dungoe raya

Sebkeu ohnoe ulon peugah
Alhamdulillah ka seumpurna

Perpustakaan
Jenderal

8



BALAI PUSTAKA — JAKARTA